

M311: Heinrich von Freiberg: Tristan (F)

0,1 WO nu richer kuenste hort .
0,2 wo schone red wo blunde wort .
0,3 wo vunde fiolengevar
0,4 wo spruche sam die rosen clar .
0,5 wo sinnic satz wo vuendic sin
0,6 d' all' ich ein weise bi-
0,7 Getichtes des gar spehen
0,8 des richen vnd des wehen
0,9 Bin ich ein erbeloser man
0,10 vn- hab mich doch genume- an
0,11 Zv volbringene dis mere
0,12 daz so blunde hat vntz her
0,13 Mit schoner red betichtet
0,14 vn- meisterlich berichtet
0,15 Min h're meister gotfrit
0,16 von strazburc d' so mange- snit
0,17 Spehen vnde richen
0,18 Schone vnde meisterlichen
0,19 Nach durneichtiges meist's site-
0,20 vz blundem sinnen hat gesnite-
0,21 vn- hat so richer rede cleit
0,22 disem sinne an geleit
0,23 dise materien er hat .
0,24 Gesprentzet in so lichte wat
0,25 daz ich zwivele dar an .
0,26 ob ich indert vinden kan
0,27 In mines sinnes gehuege
0,28 red di wol stende tuege
0,29 Bi disen spruchen guldin
0,30 Nv muege wir nicht gehabe- sin
0,31 Got vnser schopfer das gebot
0,32 daz in genumen hat der tot
0,33 Hin von dirre broden werlt .
0,34 wol geblumet vn- wol geberlt
0,35 Ist siner bluende vuende krantz
0,36 vil reine luter vn- glantz
0,37 Ist siner richer kunste hort
0,38 di toten mit den toten dort

0,39 di lebnden mit den lebnde- hie
0,40 Sint daz er diz buch verlie
0,41 vn- sin nicht hat voltichtet
0,42 vn- tichtend' berichtet
0,43 Mit dem getichte sinen
0,44 dem reinen vn- dem finen
0,45 So han ich mich genumen an
0,46 Ich tummer kunstenloser ma-
0,47 daz ich ez volbringen wil
0,48 Mit red vntz an daz iam'zil
0,49 daz tristan vn- die blunde ysot
0,50 In gluend' minne lagen tot
0,51 ob er mich lat so lange lebn
0,52 d' lip vn- leben mir hat gegebe-
0,53 Daz aber ich dise arbeit
0,54 hab minen sinne vur geleit
0,55 daz machet eines h'ren tugent
0,56 Sin hohes adel sin edele iugent
0,57 Ez mir gebot vn- mich sin bat
0,58 der truwe- stic d' zuchte pfat
0,59 Hat er mit angeborne- triten
0,60 Gebent nach herlichen siten
0,61 vrowen eren amiz vzerkorn
0,62 In behemlant ist er geboren .
0,63 dem ich diz senecliche mer
0,64 Mit innecliches h'zen ger
0,65 voltichten vn- volbringe- sol
0,66 an dem ist daz erkennenet wol
0,67 daz er mit tugentlicher tat
0,68 vil hoer wurde erworbe- hat
0,69 Zvcht maze mit bescheidenheit
0,70 Sin ellenthaftes herce treit
0,71 Manheit truwe vn- milte
0,72 Er ist ouch vnd' schilte
0,73 Ein ritter vrech vn- gar kurtoys
0,74 vn- ist ein luchtenburgonoys
0,75 von luchtenburc ist er genant
0,76 Sin man in eren ist bekant
0,77 vn- ist genennet er Reymunt
0,78 Ia reine in sines h'zen gru-t
0,79 Ist er an allez kunterfeit
0,80 der rechten reinen reinekeit
0,81 gar siner tat vn- siner werc
0,82 dem ich heynrich von vriberc
0,83 voltichte disen tristan
0,84 als ich allerbeste kan
0,85 Wir han gehort wie tristant
0,86 In arundele daz lant

0,87 zv dem h'zogen quam
0,88 dem hoer eren vil gezam
0,89 den man da nante . lovelin
0,90 Karsie hiez di h'zogin
0,91 Ir beyder sun kaedin
0,92 wie der tet an im truwe schin
0,93 der iunge suze lyfrenis
0,94 Mit aller tat in alle wis
0,95 Er im geselleschaft erbot
0,96 Vn- wie die wizgehand ysot
0,97 Blanschemanis die schoene maget
0,98 volwachsen vn- wol betaget
0,99 In megetlichen iaren
0,100 Siner minne varen
0,101 Mit allem vlize began
0,102 vnd wie der edele tristan
0,103 Mit siner sigeborn hant
0,104 des vurstens vinde vb'want
0,105 vnd von dem lande sie vertreip
0,106 vnd wie er da zv karke bleip
0,107 daz hab wir allez wol v'nume-
0,108 Nu sulle wir zv der rede kum-
0,109 do sie der meister hat verlan .
0,110 der dis buches erste began
0,111 Der trurige tristan
0,112 dem truren was geborn an
0,113 vnd vil trurens het gepflogen
0,114 vn- in trure- was erzogen
0,115 Gar truric in gedanken saz
0,116 Sin leben er in herzen maz
0,117 vn- bedachte sine not
0,118 vmb yeweder ysot
0,119 von yrlande vmb die bele
0,120 vn- vmb die von arvnde
0,121 ysot die maget von karke
0,122 die waz im also starke
0,123 Gevallen in sin herze
0,124 ydoch twanc in d' smerze
0,125 der rechten h'zenliebe gnuc
0,126 die er zv ysoten truc
0,127 d' blunde belen vz yrlant
0,128 vn- er zwialter liebe enpfant
0,129 des nam in selber wunder
0,130 vn- wundert in besvnder
0,131 daz er leit h'zeliche not
0,132 vmb itweder ysot
0,133 der wol besinnete tristan
0,134 In sinem sinne er sich v'san

0,135 vn- gedachte “ez mak . nicht sin
0,136 daz ich in dem h’zen min
0,137 Mvge zwei h’zenliep getrage-
0,138 wan ich han oft gehoret sage-
0,139 ob mer liep hat dan eines
0,140 d’ hat nindert keinez
0,141 w’ mit zwein lieben liebe pflicht
0,142 ha-t . der treit herzenliebe nicht”
0,143 Alsus gedachte tristan
0,144 “Sol ich nicht herzeliebe han
0,145 des wunder inneclichen mich
0,146 Ey herre got vn- wi bin ich
0,147 So wunderlich gescheiden
0,148 von den ysoten beiden .
0,149 vn- trage doch sie in herzen
0,150 Mit rechten herzensmercen
0,151 Itweder mir in herzen liget
0,152 Itweder hat an mir gesiget
0,153 vn- ist das herzenliebe nicht
0,154 als das sprichwort da spricht
0,155 das ich sie beide minne
0,156 Mit herzen vn- mit sinne-
0,157 So mus ich eine ysoten lan
0,158 vnd eine ysoten zv vrowe- han
0,159 Ey wenne geschiet daz od’ wie
0,160 Nv minne ich dort vnd meine hie
0,161 Ich minne hie vn- meine dort
0,162 ysot miner vrouden hort
0,163 Ich meine dich blunden vz yrlant
0,164 Mir ist din truewe wol erkant
0,165 Sol ich dich vz dem herzen lan
0,166 So werde ich truelos ein man”
0,167 Also saz er gedenkende
0,168 vn- mit gedanken wenkende
0,169 Er gedachte ie genote
0,170 Ouch an sin ander ysote
0,171 die schone wizgehande
0,172 Nicht an di vz yrlande
0,173 “Ey” gedacht er “schone ysot
0,174 Ich weiz wol daz din h’ze not
0,175 durch mine minne lidet
0,176 ob dich min lip vermidet
0,177 vn- din zv vrowen enpir
0,178 So werde ich truelos an dir
0,179 din vater vn- din muter
0,180 Min vru-t truot vn- guter
0,181 vn- min geselle kaedin
0,182 di muozen ez betruobet sin

0,183 ob ich nicht bie dir blibe
0,184 vn- dich nicht neme zcv wiebe”
0,185 diz was ein wunderlich geschit
0,186 Er wolde ir beider haben nicht
0,187 vn- wolde ir eine doch nicht lan
0,188 “ey verirreter tristan”
0,189 Gedacht er selbe wider sich
0,190 “w’ bin ich oder waz vuret mich
0,191 wo bin ich od’ wo sol ich hin
0,192 Sint ich alsus verirret bin
0,193 vnder disen ysoten zwein”
0,194 Innerdes wart er inein
0,195 daz er aber wanken
0,196 Begonde mit gedanken
0,197 Er gedacht aber hin
0,198 an sines herzen kunigin
0,199 an die bele blunde ysot
0,200 Sin wizheit riet im vn- gebot
0,201 daz er in herzen achte
0,202 vn- achtende betrachte
0,203 Alle sine vur vn- alle sin lebn
0,204 er gedachte “ez lit nicht eben
0,205 vn- kumt von krankem sinne
0,206 daz dv die kuniginne
0,207 dines ohems elich wip
0,208 hast lip vor aller wibe lip
0,209 dv sundest sere wider got
0,210 d’ tvuel d’ hat sinen spot
0,211 Mit dir getriben alze vil
0,212 von ysoten ich wil
0,213 Mich mitalle zihen
0,214 vn- wil ir minne vlihen
0,215 e daz reine suze wip
0,216 durch mich verliese iren lip”
0,217 daz waz doch sere wider sin art
0,218 des trankes . der getrunken wart
0,219 vz dem glase von in
0,220 von tristan vn- d’ kunigin
0,221 ez waz ein michel wunder
0,222 vn- wundert mich besund’
0,223 daz er die kunige-ne vloch
0,224 vn- sich von ir minne zoch
0,225 Doch merke ez w’ da sinn\c sie
0,226 daz vns voriehent astrologie
0,227 die meist’ die da kunnen sehen
0,228 vn- an dem gestirne spehen
0,229 Ir nature vnd alle ir art
0,230 Ir louf ir spere ir durchvart

0,231 Ir kelde ir hitze ir trucken ir naz
0,232 die iehent daz vnderwilen daz
0,233 an sunnen vnd an manen geschich
0,234 daz in v'lischet ir licht
0,235 vn- werden vinsten als di nacht
0,236 Sinnic man vn- wol bedacht
0,237 diz meinen rechte vornim
0,238 Man nennet iz eclypsim
0,239 Eclypsis als ich spreche
0,240 daz heiset ein gebreche
0,241 wan den planeten daz geschicht
0,242 daz in irs schines gebricht
0,243 Sint svnne vnd mane iren schin
0,244 di des gestirnes vursten sin
0,245 vnd'stunt vorlesin
0,246 So muge wir daz ouch kiesen
0,247 daz die andern hymelstern
0,248 Ovch vnderwilen enpern
0,249 Ir glastes vnd ir schines
0,250 d' svn Reywalines
0,251 d' sorgen riche tristan
0,252 d' mocht ovch einen stern han
0,253 Mit d' kunigin gemein
0,254 d' im nu nicht als e erschein
0,255 vn- ir beider minne pflac
0,256 an dem die kraft des trankes lac
0,257 vn- genaturet nach im waz
0,258 den si da trunken vz dem glaz
0,259 diz merke wer ie sinnic wart
0,260 Iich mac dem tranke nicht sin art
0,261 abe gereden noch en kan
0,262 wan mit d' rede die getan
0,263 Ist von dem gestirne hie
0,264 wer nv baz beredet sie
0,265 d' kunste d' wurde ich im wol gan
0,266 doch wisset daz er tristan
0,267 Sinen mvt vn- sinen sin
0,268 zoch vaste von d' kunigin
0,269 wan er bedachte starke
0,270 daz der kunic marke
0,271 Siner muter brud' waz
0,272 vn- als er in sin herze laz
0,273 vn- di svnde geachte
0,274 vnd daz vnrecht betrachte
0,275 vn- ovch d' eren vn-gewin
0,276 da liez er die kvnigin
0,277 Ir lip ir leben ir minne
0,278 vz sines herzen sinne

0,279 vn waz im ein gemeiner lip
0,280 doch lieber wan ein and' wip
0,281 Ey blunde kvnigin ysot
0,282 Ir lebet im noch . vn- ist er tot
0,283 vch . bie lebendingem leben
0,284 dem uw' minne hat gegeben
0,285 Ofte richer vrouden vil
0,286 Mit loube ich daz sprechen wil
0,287 vn- westet ir z daz er tristan
0,288 Evch vz dem herzen hat gelan
0,289 Ir wantet uw' gemute
0,290 Mit wiplicher gute
0,291 an den kunic uweren man
0,292 vn- nicht an ern tristan
0,293 waz red ich od' wo wil ich hin
0,294 waz weiz ich ob der kunigin
0,295 ovch der stern erloschen waz
0,296 d' minne da von ich e . las
0,297 vn- ob der minnetranc sin art
0,298 Gein ir als gein im haet v'kart
0,299 So daz die kvniginne
0,300 Ir meine vn- ir minne
0,301 wante an irn elichen man
0,302 vn- nicht an hern tristan
0,303 wie dem nu sie daz laze wir varn
0,304 Tristan Rywalines barn
0,305 d' bedachte vurbaz
0,306 In sinem herzen diz vn- daz
0,307 vmb die wizgehande ysot
0,308 die ime so minneclich erbot
0,309 offenbar vn- tavgen
0,310 Mit herzen vn- mit ovgen
0,311 Mit rede vn- mit geberden
0,312 Blantschewanis die w'den
0,313 gar liplich er in herze- truc
0,314 Mit rechter herzenliebe gnvc
0,315 als er ez wol erscheinete
0,316 er minnete vn- meinete
0,317 von herzen die vil schone maget
0,318 ovch ist ez alz daz sp'chwort saget
0,319 vremde scheidet herzenliep
0,320 So machet state manche- diep
0,321 dvrch vremde er iene ysote- vloch
0,322 zv diser er durch state zoch
0,323 dvrch vremde er iene ysote- meit
0,324 dvrch state er diser waz bereit
0,325 Mit dinstlichen dingen
0,326 vn- in begonde twingen

0,327 die minne vaste vn- gnvc
0,328 die er zv der magde truc
0,329 er gedacht an kaedinen
0,330 den gesellen sinen
0,331 vn- sante nach im sa zehant
0,332 Nu kaedin wart besant
0,333 vn- er zv tristane quam
0,334 Tristan in heimelichen nam .
0,335 vn- leite im sine willekvr
0,336 vn- sines herzen wille vur
0,337 vz inencllichem herzen sprach
0,338 Tristan diz wortes er v'iach
0,339 "ey svzer vrunt lyfrenis
0,340 Laz dinen vurstlichen pris
0,341 an mir enlenden w'den schin"
0,342 "waz meines du" sprach kaedin
0,343 "vru-t liber od' was wirret dir"
0,344 Al sufzend vz sines herzen gir
0,345 antwurt im er tristan
0,346 er iach "ich mak noch en kan
0,347 gewenden mine sinne
0,348 von diner swester minne
0,349 Blantschewanis die schone ysot
0,350 die tut mir endelich den tot
0,351 ob sie nicht wirt zv vrowe- mir
0,352 Nv liget al min trost an dir
0,353 rat liber vrunt gehvwer
0,354 vn- gip mir rates stiwer
0,355 wi si mir w'de zv wiebe
0,356 vn- ich hie bie ir blibe"
0,357 Kaedin der sach in an
0,358 "vn- meinet ir z er tristan"
0,359 sprach d' svze lyfrenis
0,360 Tristan sprach "ritterlichen pris
0,361 den mvz ich nymmer me beiage-
0,362 ob ich dir vnrecht welle sagen
0,363 Ich minne diner swester lip
0,364 vor alle megde vn- alle wip"
0,365 Nv waz d' svze lyfrenis
0,366 v'stendic sinnis vn- wis
0,367 vn- er tristanes ernst sach
0,368 gar sinneclich er iach
0,369 "vrunt liber vn- geselle min
0,370 Min rat d' sol dir nvtze sin
0,371 Ich lege dines herzen kvr
0,372 Minem vater gerne vur
0,373 vn- dar zv miner mvter
0,374 ovch wirt min rat dir guter

0,375 gein miner swester wisse daz
0,376 si dir ovch nicht ist gehaz
0,377 des han ich e vorstanden mich”
0,378 hie mite schiden sie sich
0,379 kaedin von herzen vro
0,380 der mere waz vn- kerte do
0,381 von tristante sa zvhant
0,382 alda er sinen vater vant
0,383 vn- sine mvter bie einander
0,384 ysote sine swester vand er
0,385 Mit zvchten bi in sitzen
0,386 lachend vnd mit witzen
0,387 Sprach er der schonen magt zv
0,388 “ysot min swester sitzi du
0,389 von vns ein weninc hin dan
0,390 Mit minen vater ich han
0,391 Zv reden heimeliche dinc
0,392 vrowe mvter” sprach d’ iungelinc
0,393 “Nv neiget uw’ ore her”
0,394 mit diser red kniete ovch er
0,395 vur vater vn- vur mvter
0,396 Sin mvt vrut vn- guter
0,397 vnd sine zvcht im daz gebot
0,398 er iach “vater vnser not
0,399 di wil mit vrouden enden sich
0,400 min vrunt er tristan d’ hat mich
0,401 her gesant zv vch zwein
0,402 vn- ist des worden inein
0,403 mac er an vch gnade vinden
0,404 daz er sich wil vnd’winden
0,405 der swester min zv wibe
0,406 vn- daz er bie vns blibe
0,407 des begert er inneclich”
0,408 d’ mere von herzen vrowten sich
0,409 der h’zoge vnd die herzogin
0,410 “min liber svn kaedin
0,411 v’stendic vnd vruter”
0,412 sprach zvrz im sin mvter
0,413 “wenne ist die red geschehen
0,414 od’ wo hat er dir v’iehen
0,415 der liben mere die du sages”
0,416 her iach “hvte diz tages
0,417 tet er mir w’lich si kunt
0,418 Ich ge von im an dirre stunt
0,419 vn- w’be als er mich w’be- bat
0,420 vn- rat ez ovch sint daz er hat
0,421 Gewendet sine sinne .
0,422 an miner swester minne

0,423 So sul wir sinem libe .
0,424 Geben si zv wibe
0,425 vn- wizzet daz vnser selickeit .
0,426 wirt von im lanc wit vn- breit .”
0,427 Der h’zoge vn- die h’zogin .
0,428 vn- ir svn kaedin .
0,429 Lyfrenis d’ iungelinc .
0,430 vm dise seliclichen dinc .
0,431 Machten kvrcz iren rat .
0,432 wes man sich vor betrachtet hat
0,433 vn- von h’zen hat begert .
0,434 des rates red’ nicht lange wert .
0,435 Als geschach in ovch alhie .
0,436 vil schire sich beriten sie .
0,437 vn- wurden des zv rate .
0,438 In ir h’zen drate .
0,439 Sie wolden tristande .
0,440 Geben die wizgehande
0,441 waz sol diser rede me .
0,442 des sie gewunschet hetten e .
0,443 des wurden sie gebeten nv .
0,444 Sie sprachen ysoten zv .
0,445 der zvchen vn- d’ wisen .
0,446 der maget blantschewanen .
0,447 die reine valches vrie .
0,448 Ir muter vrow karsie .
0,449 hiez liplich zv ir sitzen .
0,450 vn- leit ir vur mit wiczen .
0,451 Tristandes wille- vn- sine- sin .
0,452 Karsie die gvte herzogin
0,453 vragete sie der mere
0,454 ob ez ir wille were
0,455 daz sie hern Tristan
0,456 wolde nemen zv man
0,457 Blantschewanen die schone ysot
0,458 gar megetliche red bot
0,459 Irem vater vn- ir mvter
0,460 “waz uwer wille gvter
0,461 Ist vnd kaedines
0,462 des liben bruder mines
0,463 daz ist ovch wol der wille min
0,464 solt ich sin halt betrubet sin”
0,465 betrubet sprech ich also
0,466 nein z war sie waz von h’zen vro
0,467 des liben tages vn- d’ liben zit
0,468 vn- wuchs ir vrowde wider strit
0,469 In herzen vnde in sinne
0,470 wan sie meine vn- minne

0,471 het an in einen gewant
0,472 nv wart er Tristan besant
0,473 Lyfrenis kaedin
0,474 der gienc nach dem gesellen sin
0,475 an siner hende svnder haz
0,476 vurt er in da sin vater waz
0,477 Sin mvter vn- die schone ysot
0,478 Itwiderz im die wurde erbot
0,479 daz sie gein im giengen
0,480 vn- in vruntlich enpfiegen
0,481 Die herzogin karsie
0,482 die kvsche wandels vrie
0,483 nam ern Tristanden
0,484 Mit iren wizen handen
0,485 vn- satzte in an ir siten
0,486 vn- vraget in in den ziten
0,487 ob ez were der wille sin
0,488 vm die botschaft als kaedin
0,489 het geworben wider sie
0,490 “genade vrowe mir wart nie
0,491 Mim sin min herze vnd min mvt
0,492 Zv keinen dingen . nie so gut”
0,493 Sus antwurt ir er tristan
0,494 der herzoge lovelin sprach san
0,495 vz innecliches herzen grvnt
0,496 “Nv svlt ir hunder tusent stunt
0,497 gote vn- mir willekome sin
0,498 svn vn- liber eidem min
0,499 vch sol wesen vndertan
0,500 lant vn- livte vn- waz ich han”
0,501 waz sol ich lange hie von sagen
0,502 daz heilictum wart dar getrage-
0,503 vn- wart tristande vur gehabet
0,504 vn- wart im d’ eit getabet
0,505 Nv svor ovch her tristan
0,506 daz er wolde ysoten han
0,507 vn- nemen sine liebe
0,508 Zv einem elichen wibe
0,509 Dar nach vb’ vier wochen
0,510 berufen vn- besprochen
0,511 Bekriet schone vn- beschriet
0,512 wart des vrusten hochgeziet
0,513 Recht vf die zit zv pfingesten
0,514 die sweresten vn- die ringesten
0,515 In des herzogen lant
0,516 die wurden alle besant
0,517 Barvn vn- lantherren
0,518 die minneren vn- die merre-

0,519 Beide ritter vn- knechte
0,520 geziret wol nach sinem rechte
0,521 Solde ied' man zv hove kvme-
0,522 nv die botschaft wart v'nume-
0,523 In dem lande vberal
0,524 vn- der svze rvf erschall
0,525 von dem edelen tristande
0,526 daz er maget die wizgehande
0,527 Nv zv vrouwe- solde han
0,528 des wart im heiles wuns getan
0,529 von manger edelen zvngen
0,530 die alden vn- die iungen
0,531 Rich vn- arm waren do
0,532 Sin gemeinelichen vro
0,533 Waz nv der herzoge tv
0,534 er liez ot vaste vuren zv
0,535 Beide triben vn- tragen
0,536 In schiffen vn- uf mange- wage-
0,537 di beste spise den besten win
0,538 waz ot gvtes mochte sin
0,539 alda in sinem lande
0,540 vn- waz er recht erkande
0,541 daz in gewirden mochte
0,542 vn- waz im zv nutze tochte
0,543 zv siner tochter hochzit
0,544 ovch zierten sich in wid'strit
0,545 die herren von dem lande
0,546 mit richlichem gewande
0,547 vn- mit aller zierheit
0,548 Riche wat vn- riche cleit
0,549 waz in nach herrelichen siten
0,550 gein der hochzit gesinten
0,551 da nv die zit wunnesam
0,552 vn- der benante tac quam
0,553 als die hochzit waz geleit
0,554 vil mange storie zv reit
0,555 von rittern vn- vo- vrouwe-
0,556 man mochte wund' schowe-
0,557 an manger ritterlichen schar
0,558 vn- an manger vrowe- clar
0,559 die da gefeigetiret
0,560 Schone vn- wol gezieret
0,561 Brachten engelischen schin
0,562 alda zv karke mit in in
0,563 Da mit den gesten als ich las
0,564 hus vn- stat gevullet was
0,565 vn- man herberge ir gewan
0,566 daz man ir nymmer mochte han

0,567 da sluc man hutten vn- gezelt
0,568 alvm die stat vf daz velt
0,569 vo- pfelle vn- ovch von siden
0,570 ein vrolich herze liden
0,571 wol mochte svnder leide
0,572 dise vrolich ovgelweide
0,573 w' uf dem hus od' in der stat
0,574 dvrch schowe- an die zinnen trat
0,575 vn- ovgelweide wolde spehen
0,576 der mvste in sinem herze- iehe-
0,577 daz er sehe in alle wis
0,578 min in der vrowe- paradys
0,579 Nv nahet is d' vesperzit
0,580 "hol a vuter" wart geschrit
0,581 "zv dem hove des herre- min
0,582 des herzogen lovelin
0,583 des vurstes von arvndile"
0,584 dise krie er ofte schre
0,585 Ein knappe wen er konde ez wol
0,586 "hol a vuter hol a hol
0,587 hol a vuter hol a vuter"
0,588 dar nach ein knappe vruter
0,589 Rif lute vn- nicht lise
0,590 "hol a hol a kvchen spise"
0,591 So rif aber einer "hol a tranc"
0,592 wer sich ot da zv hove dranc
0,593 dem gap man alles des zv vil
0,594 des ein herze wunschen wil
0,595 von ezzen vn- von trinken
0,596 di svnne begonde sinken
0,597 di zit sie mit ir brachte
0,598 da bie man wol gedachte
0,599 ob man s bedenken wolde
0,600 daz man zv abent ezzen solde
0,601 Nv wart ovch da gesvmit nicht
0,602 die tische wurden gericht
0,603 Tvch vn- brot dar vf geleit
0,604 nv waz daz wazzer bereit
0,605 ysot die maget des ersten
0,606 mit iucvrowe- den hersten
0,607 In zvchten wazzer da nam
0,608 dar nach manch vrowe wu-nesa-
0,609 die vurstes wazzer namen
0,610 vil herren dar zv quamen
0,611 vn- manch ritter wu-nentlich
0,612 namen wazzer vn- saczten sich
0,613 mit zvchten man in vur truc
0,614 wol bereiter spise gnvc

0,615 vn- schankte in vzerwelten win
0,616 In trinkvassen gvldin
0,617 waz hilfet ob ich s machte lanc
0,618 da man nv gaz vn- getranc
0,619 vn- man die tische danne truc
0,620 karsie sinnic vnd kluc
0,621 hiez die videlere
0,622 vf strichen wunnebere
0,623 vn- . sie machen eine- tantz
0,624 daz geschach manch richlich swantz
0,625 von schone- vrowe- wart gesehn
0,626 an dem tantz hort ich iehn
0,627 der hochgemute tristant
0,628 nam ysoten an die hant
0,629 vn- vurte zv dem tantz sie
0,630 vil herren rittere iene vn- die
0,631 alte zvchteclich vn- iungen
0,632 gemeine zv dem tantz drv-ge-
0,633 Da sie nv vrolich tantzten
0,634 In vrouden vm swantzten
0,635 Irrendes ein bischof quam
0,636 In den tantz als ich v'nam
0,637 Sin ornat mit zirheit
0,638 hat er schone an sich geleit
0,639 d' herzoge lovelin
0,640 vn- sin svn kaedin
0,641 die namen die maget ysote-
0,642 an sorgen gar die toten
0,643 vn- vurten s in den rinc
0,644 d' hochgemute iu-gelinc
0,645 von permenie tristan
0,646 d' mvste gein d' magde stan
0,647 waz sol ich hie von spreche- me
0,648 d' bischof im zv recht' e
0,649 gap ysoten die maget
0,650 vn- gap in ir als diz buch saget
0,651 vn- wart diz zwischen in beiden
0,652 mit truwe- vn- mit eiden
0,653 Bestetet als iz solde sin
0,654 er gap ir sin vingerlin
0,655 vn- sie im daz ire wider
0,656 hie mit gesazen sie nider
0,657 vil kertzen wurden vf gezvnt
0,658 Man brach in trinken sa zvstunt
0,659 da sie getrvnken da hies man
0,660 Tristane sa zv bette gan
0,661 her tristan ginc zv bette
0,662 vil schire er sich enpfette

0,663 vn- leit in groze- vroude- sich
0,664 ysote die maget wunnendlich
0,665 die wart gevuret im aldar
0,666 von der vrolichen schar
0,667 In mvter karsie
0,668 die reine valsches vrie
0,669 die hochgemvte herzogin
0,670 Tristanden an den arm sin
0,671 Ir lieben tochter leite
0,672 der magde sie da saite
0,673 vn- dem hochgemvte degen
0,674 mit worton mange- svze- sege-
0,675 die kuschen vn- die claren
0,676 vrowe- die da waren
0,677 Mit ir in der keminaten
0,678 Iren segen ovch sie taten
0,679 vber sie vn- giengen hin vur
0,680 karsie die tet zv die tur
0,681 Tristan stvnt vf vn- sloz
0,682 da vur ovch eine- rigel groz
0,683 Die wile daz her tristan
0,684 die tur sliezen began
0,685 So lac sines herze- vrowe dort
0,686 Siner nuen vrouden hort
0,687 Blantschewanis die schone ysot
0,688 vn- besorget ire not
0,689 vmb ir megetlichen rvm
0,690 vn- vm ir blunden magettum
0,691 Zw kerczen ob ir brvnnen
0,692 ysot die maget der svnnen
0,693 waz mit ir schone nahen glich
0,694 Sie lac dort harte megetlich
0,695 vn- waz gedanken nicht ein gast
0,696 nv gap der kercze- wid'glast
0,697 Ir hermilwize scheitel
0,698 ysot nam ir pfeitel
0,699 Ir wisen bein ir linden
0,700 begonde sie dar in winden
0,701 Sie want vn- bark sich vaste dar in
0,702 Sie wolde daz blunde- blumeli-
0,703 Ir blunde- magetvmes wern
0,704 eine wile vor tristande nern
0,705 Ir beide dich ir beide knie
0,706 an ir buchel dructe sie
0,707 vaste vn- minnenclichen z war
0,708 Sie hat irz magetvmes var
0,709 die schone maget blantschema-is
0,710 Ir blanken arme crvcewis

0,711 vaste vber einand' schrencte
0,712 gein herzen sie sich lencte
0,713 vn- drvct es vf ir brustel
0,714 Sie dachte "ob ein gelustel
0,715 von herzen tristande gat
0,716 daz er dich minnenclich bestat
0,717 So vindet er dich ovch b%ie wer
0,718 ob ich mich eine wile ner
0,719 vor im durch megetliche- pris
0,720 der iunge svze permenis
0,721 her nach mich habet dest' bas"
0,722 ey wie wol bedachte das
0,723 d' minne ein menschlich nozel
0,724 sie lac an einem clozel
0,725 Zvsamme gedrvcket
0,726 vn- minneclich gesmucket
0,727 In megetlichem rvme
0,728 Sie het ir magettvme
0,729 gebuwet eine vesten
0,730 vz gezvge dem besten
0,731 als ir mvter het erzogen
0,732 vz armen vn- vz elleboge-
0,733 vz henden vn- vz beinen
0,734 Ir vesten dach der reinen
0,735 daz waz ein heimde sidin
0,736 da hat sie sich geprisit in
0,737 vn- vornehet so minne-lich
0,738 daz sin halt noch iamert mich
0,739 daz ez von tristandes hant
0,740 nich wart zvrissen noch zvtrant
0,741 Her trista- ginc zv bette wider
0,742 er leite sich bi die maget nider
0,743 vn- dacte sich liplich zv ir
0,744 Sin h'ze vn- al sins herze- gir
0,745 sin wille sin sin vn- al sin mvt
0,746 waz im gein d' megde gvt
0,747 an sie gar nahe- smvcte her sich
0,748 vn- begonde gar vruntlich
0,749 gein der megde gebaren
0,750 Ir magetvmes varen
0,751 gar minne-lich er wolde
0,752 als er zv rechte solde
0,753 er begonde naher grifen
0,754 den arm liz er slifen
0,755 vn- leite in vnd' ir helsilin
0,756 "Ia" gedachte ysot "ez mvz nv sin"
0,757 Sie het sich alles des erwegen
0,758 des er mit ir wolde plegen

0,759 Ir wille ir megtlicher mvt
0,760 waz ovch gein manne gvt
0,761 minne vn- lust die gienge- entwer
0,762 vnder in hin vn- her
0,763 die maget in siner minne bran
0,764 vn- in ir minne bran d' man
0,765 er gert ir sie begerte sin
0,766 o we nv het ein vingerlin
0,767 her tristan an siner hant
0,768 da bi er etiswes ermant
0,769 wart . do von er quam in not
0,770 wie wol ez im ysot erbot
0,771 sin lip erbibet vn- erschrac
0,772 sin herz ersvfczet vn- er gelac
0,773 Gelac er ia w' her tristan
0,774 gelac rechte als ein toter ma-
0,775 war vmme lac er lebende- tot
0,776 da quan ien ander ysot
0,777 von kurnewal die kvnigin
0,778 die im da gap daz vingerlin
0,779 als ir trvwe daz geriet
0,780 da er in truwe- von ir schiet
0,781 dort in dem garte- daz geschach
0,782 da der kvnic selber sach
0,783 Tristanden . svn d' swester sin
0,784 ligen mit der kvnigin
0,785 Die selbe blunde bel ysot
0,786 die qua- rech als ein morge-got
0,787 vn- als ein brehend' svnne-schin
0,788 Tristanden in daz herze sin
0,789 Ir beider vrowe die minne
0,790 die vrece stormerinne
0,791 die qua- dort her sturmrvschende
0,792 Mit irm vlamme- luschende
0,793 vn- mit ir herze- viwere
0,794 vn- vurte die gehiwere
0,795 ysot die blunde- vz yrlant
0,796 dvrch der kemnate- gantze want
0,797 vn- legete sie gar snelle
0,798 Recht in die innern zelle
0,799 die in tristanes herzen was
0,800 da nam sie tristan als ich las
0,801 vn- legete sie lieplich hin in
0,802 In sines herze- inren schrin
0,803 alda sins geist sins leben pflac
0,804 da lac sins herzen ostertac
0,805 ysot die blunde la bele
0,806 vn- ysot von arundele

0,807 die lac im an dem arm hie
0,808 “was meinet er” gedachte sie
0,809 “daz er also stille liget
0,810 vn- alles des mit dir nicht pfliget
0,811 des liep mit liebe pflegen sol
0,812 Ich kond doch im geantwurte- wol
0,813 ob in des nicht betragete
0,814 daz er mich ichtes vragete
0,815 Nv han ich disem lieben man
0,816 Ni kein vngemach getan
0,817 war vm zvrnet er wid’ mich
0,818 ey herre weder bin ich
0,819 Im zv iunc od’ zv alt
0,820 od’ bin ich als vngestalt
0,821 daz er min nicht zv wiebe wil”
0,822 der gedanken treip sie vil
0,823 ob ich s mit loube spreche- tar
0,824 so weste sie wol waz ir da war
0,825 doch vur ir meister trost hie mite
0,826 daz sie gedachte “ez ist ein site
0,827 vil lichte in permenie
0,828 daz man die megde vrie
0,829 vn- kusche let die erst nacht
0,830 Ist sin durch ein zucht erdacht
0,831 So mak ez wol gevuge sin
0,832 sie haben dester lichtern schin
0,833 wene sie des morge-s vf sten
0,834 von bette zv den luten gen”
0,3005 O we d’ minnetranc
0,3006 die gelieben ab’ twanc
0,3007 Tristanden vn- die blunde ysot
0,3008 daz sie von minne liden not
0,3009 d’ h’zenlieben smerze
0,3010 d’ twanc ir beid’ h’ze
0,3011 des mannes vn- des wibes
0,3012 Tristan ysoten libes
0,3013 wold ab’ gewaldic w’den
0,3014 Mit welch’ hande geberden
0,3015 er ez gefugen konde
0,3016 Tantrisel er begynde
0,3017 vor legen alle die tovgen sin
0,3018 vn- waz er gein d’ kvnigin
0,3019 daz kint mit triwen w’ben hiez
0,3020 Tantrisel des nicht en liez
0,3021 ez warp ez vn- kond ez wol
0,3022 wan ez waz kvndikeite vol
0,3023 vn- waz ysoten heimelich
0,3024 von im wurden listiclich

0,3025 Ir beid' towgen v'holn
0,3026 alsus wart Marke ab gestoln
0,3027 aber vil d' eren sin
0,3028 Tristant vn- die kvnegin
0,3029 die triben ir aldes erbespil
0,3030 vn- pflagen des sol vil
0,3031 da von ein niwer mutschal
0,3032 wart in dem hove vb'al
0,3033 Tantrisel wie v'swigen daz was
0,3034 ez half sie doch nicht als ich las
0,3035 die werlt vns vrkvnde git
0,3036 daz d' biderbe svnd' nit
0,3037 gar selten blibet wo d' ist
0,3038 als wart geniden in d' vrist
0,3039 d' eren gernde tristan
0,3040 ovch von etlichem man
0,3041 d' sinem lebne schachte
0,3042 vn- Marken zv orn brachte
0,3043 Ir towgen vn- ir minne
0,3044 sin vn- d' kvneginne
0,3045 Nv war d' kvnic Marke
0,3046 erzvrnet ab' stake
0,3047 vn- truc den alden arcwan
0,3048 Gein sinem neven tristan
0,3049 Mit leidecllichem smerzen
0,3050 sw'lich in sinem herzen
0,3051 vn- waz stetes achtende
0,3052 gedenkende vn- trachtende
0,3053 In h'zen vn- in sinne
0,3054 ob er die kvneginne
0,3055 die blunde ysoten vz yrlant
0,3056 vn- sinen neven tristant
0,3057 Mit einander vunde
0,3058 so daz er vb'wunde
0,3059 sie beide mit d' waren tat
0,3060 nv quam er gentzlich an den rat
0,3061 daz er Tristande tet bekant
0,3062 er wode in brytanienlant
0,3063 Riten . zv dem kvnige artus
0,3064 "vn- Tristan laz dir min hvs
0,3065 vn- min gesinde enpfolhen sin
0,3066 vn- pflic des vf die triwe din
0,3067 wan ich des wol getruwe dir
0,3068 dv haldes dine triuwe an mir"
0,3069 d' kunic do bereitet wart
0,3070 gar listeclichen uf die vart
0,3071 vn- reit mit listen manicvalt
0,3072 bi Tyntaiol in enen walt

0,3073 vn- waz dar inne vntz an die nacht
0,3074 die bosen nider vngeslacht
0,3075 Tristandes . het er bi Tristan
0,3076 alda zv tyntaiol gelan
0,3077 die offenten im ein pfortelin
0,3078 d' kvnic zv d' burge sin
0,3079 Quam wider vn- wart in gelan
0,3080 Nv waz ovch h' Tristan
0,3081 gegangen zv der kvnegin
0,3082 In die kemenaten hin
0,3083 vn- hettet sich enpfettet
0,3084 Im waz ovch wol gebettet
0,3085 er wante ligen ane var
0,3086 Nv quam ovch d' kvnic dar
0,3087 vn- mit im alle sine man
0,3088 die er da bi im mochte han
0,3089 die tur er mit gewalt vf sties
0,3090 als sin zorn riet vn- hiez
0,3091 vn- vienc tristan den neven sin
0,3092 vn- mit im die kvnegin
0,3093 Sin elich wip die schone ysot
0,3094 o we d' schemelichen not
0,3095 die di sine zwei gelieben liden
0,3096 Ir hende bant ma- in mit widen
0,3097 vn- mit riemen starke
0,3098 ovch hies sie legen marke
0,3099 In einen vinstern kercher
0,3100 alda lac sie . lac da ovch er
0,3101 vncz daz d' lichte tac erschein
0,3102 d' kvnic des morgens wart inein
0,3103 daz er an daz gerichte saz
0,3104 vn- hiez offentlichen daz
0,3105 kvnden in dem lande
0,3106 Man solde tristande
0,3107 v'terben vn- die kvnegin
0,3108 Nv quam zv dem gerichte hin
0,3109 von dem lande manic man
0,3110 vn- d' getriwe von lytan
0,3111 d' eren riche Tynas
0,3112 d' gantzer vrunt tristandes was
0,3113 Mit triwen in dem h'zen gar
0,3114 d' quam ovch zv gerichte aldar
0,3115 nv vurte man sie beide vur
0,3116 nach des kvnges willekvr
0,3117 Tristanden vn- die kvnegin
0,3118 Ir hende waren gebunden in
0,3119 die schemeliche smaheit
0,3120 was inneclich von h'zen leit

0,3121 Tynasen dem getriwen man
0,3122 den man da nante von lytan
0,3123 d' truchtsede des kvneges was
0,3124 er bat den kvnic als ich las
0,3125 durch got vn- durch die ere sin
0,3126 daz er die edelen kvnegin
0,3127 vn- siner swest' svn tristan
0,3128 nicht also gebunden stan
0,3129 vor dem gerichte lieze .
0,3130 vn- durch sin adel hieze
0,3131 In vf losen ire bant
0,3132 d' kvnic schire wart gemant
0,3133 ir adels vn- ir hohen art
0,3134 vn- hiez vf losen mit d' vart
0,3135 von iren handen die bant
0,3136 waz mir die auentiw' bekant
0,3137 hat getan daz mvz ich sagen
0,3138 d' kvnic begonde selbe clagen
0,3139 vn- sprach in an den lip
0,3140 nv wart vorteilet man vn- wip
0,3141 Tristan vn- sin trut ysot
0,3142 die mvsten liden den tot
0,3143 ysoten ysalden geburt
0,3144 der wart ertelet die hurt
0,3145 vn- dem getriwen tristan
0,3146 d' vntriwe nie gewan
0,3147 In dem reinen h'zen sin
0,3148 alsam ein hyrsenkornelin
0,3149 dem wart erteilet daz rat
0,3150 Tynaz al weinende bat
0,3151 den kvnic vmb den neven sin
0,3152 vn- vbm die blunde kvnegin
0,3153 daz er durch got sie lieze leben
0,3154 ez half ot nicht sie muste- gebe-
0,3155 ir leben vmb die minne
0,3156 nv wart die kvneginne
0,3157 vn- ir lib' vru-t tristan
0,3158 vor die stat gevuret san
0,3159 hin gein dem plan mit riwe-
0,3160 da man die vn-getriwen
0,3161 zv v'terben pflac
0,3162 vf des wazzere stade lac
0,3163 an dem wege ein capelle
0,3164 d' wart her tristan snelle
0,3165 In sine- note- gewar .
0,3166 er bat daz man in vurte dar
0,3167 dvrch daz er sin' sunde- sich
0,3168 gein gote erclaget inneclich

0,3169 die in gevangen vurten da
0,3170 die v'sagten im daz san
0,3171 vn- vurten vngevuclich in
0,3172 vaste gein dem rade hin
0,3173 Der truchtseze Tynaz
0,3174 d' im so holt in h'zen waz
0,3175 d' quam inrdes gerite-
0,3176 vn- horte tristande biten
0,3177 vn- daz im iene v'sagten
0,3178 vn- vaste gein im pagten
0,3179 d' getriwe von lytan
0,3180 sprach "ir sult in lazen gan
0,3181 durch minen willen hin in
0,3182 vn- sul wir alle hvten sin
0,3183 vor d' capellen hie"
0,3184 wes er da iach de volgete- sie
0,3185 wan bi dem kvnege sin gewalt
0,3186 waz michel vn- manvalt
0,3187 h' tristan in daz kirchel gienc
0,3188 ob er nv wislich an gevienc
0,3189 sin dinc w'lich des waz im not
0,3190 wan er het gewis den tot
0,3191 ein venster an dem kirchel waz
0,3192 nv ergienc diz sprichwort als ich laz
0,3193 wem got wol dem nimant vbel
0,3194 vnd' den venst' ein hubel
0,3195 waz ob eines tote- grab
0,3196 Tristande got zv selde- gab
0,3197 daz die vzzere- nicht gewar
0,3198 wurde- daz er gienc aldar
0,3199 d' permenoys des kvneges mak
0,3200 viel durch daz venst' in den wak
0,3201 vn- swam daz wazzer hin zv tal
0,3202 Tantrisel vn- Curuenal
0,3203 In getriwelichem siten
0,3204 ware- vor die stat geriten
0,3205 In sulch' hofe-nunge
0,3206 ob tristan d' iunge
0,3207 geboren vz vursten kvnne
0,3208 Mit keiner list entrunne
0,3209 daz sie zu hulfe im queme- dar
0,3210 nu wart her Tristan ir gewar
0,3211 al vlizende in dem wazzer
0,3212 er waz d' lider nicht lazzer
0,3213 vn- swam snellich vn- gerade
0,3214 gein sinen vrunden zv den stade
0,3215 da sie ersahen in nv hie
0,3216 w' da vroer danne sie

0,3217 sie hetten mit in brach aldar
0,3218 sin ros vn- allez sin wapen gar
0,3219 schil vn- helm . swert vn- sper
0,3220 nv wart ovch wol gewapent er
0,3221 also vuchte vn- also naz
0,3222 her tristan vf sin ros da saz
0,3223 vn- kerte ob' daz gevilde
0,3224 hin vaste gein dem gewilde
0,3225 In einen pusch er da gehielt
0,3226 sin h'ze grozer triwe wielt
0,3227 gein d' edelen kvneginne
0,3228 er wolde des ie w'den inne
0,3229 ob sie dem tode were ergebn
0,3230 od' ob sie behielde ir lebn
0,3231 Nv stunden iene noch aldort
0,3232 die den totlichen mort
0,3233 solden haben getan
0,3234 an dem edelen tristan
0,3235 sie warten vor d' kirchen tur
0,3236 wenne h' wolde gen h' vur
0,3237 ez half sie nicht in waz enpfarn
0,3238 d' visch mit krefte- durch daz garn
0,3239 h' tristan waz entrvnnen in
0,3240 sie giengen in die kirchen hin
0,3241 vn- svchten hin vn- her
0,3242 sie vunden nicht . nv dise mer
0,3243 d' kvnic marke v'nam
0,3244 In h'zen er des swinde erquam
0,3245 vn- wart dar vmb erzvrnet gar
0,3246 er iach "nv dar . nv dar . nv dar
0,3247 wol vf alle die hie sin
0,3248 vn- iaget nach dem neven min
0,3249 daz wazzer allez hin zv tal"
0,3250 daz wolk erhub sich vb'al
0,3251 daz vf dem velde da waz
0,3252 vn- d' getriwe Tynaz
0,3253 d' mvste iagen mit in
0,3254 d' Tristande lieb' hin
0,3255 hette geholfen danne gevangen
0,3256 nv diz waz ergangen
0,3257 daz sie von dem mortwal
0,3258 waren kvmen vberal
0,3259 Dv stunt die bele blunde ysot
0,3260 noch in bitterlicher not
0,3261 gevangen bi d' glunden hurt
0,3262 die kvnicliche geburt
0,3263 d' ie wipliche gvte
0,3264 vz reinen h'zen blute

0,3265 alsam eine niwe rose clar
0,3266 vn- als ein lylie glantzgevar
0,3267 die gein d' lichten svnnen schin
0,3268 also wiz vn- also phin
0,3269 blut schone vf einem stengel
0,3270 die glich' einem engel
0,3271 waz . danne einem wibe
0,3272 vn- an ir zarten libe
0,3273 waz linder den ein sidel
0,3274 Tristande neve tantrisel
0,3275 waz von im geriten her
0,3276 vn- ervur gar dise mer
0,3277 vn- reit hin wider sa zvtunt
0,3278 vn- tet sie tristande kvnt
0,3279 alsus wart von im gesaget
0,3280 "ohem d' kvnic dir nach iaget
0,3281 vn- mit im alle die sine
0,3282 ysot die vrowe mine
0,3283 dort bi d' hurt in hute hat
0,3284 vz der stat d' potestat
0,3285 vn- ist nimant bi im da
0,3286 wan sine schergen vn- iesa
0,3287 wenne d' kvnic kvmt gerant
0,3288 so wirt min wroe ysot v'brant"
0,3289 "wirt sie v'brant" sprach tristan
0,3290 "Nv en welle got sint daz ich han
0,3291 Min leben vn- gesvnden lip
0,3292 so brenge ich daz reine wip
0,3293 Mit gotes helfe vz d' not
0,3294 od' ich gelige mit ir tot"
0,3295 nv wart v'bunde- im sin helm
0,3296 er tengete gras vn- stowbte melm
0,3297 hin reit er gein dem mortwal
0,3298 Mit im d' w'de Curuenal
0,3299 zv Tantrisel sprachen sie
0,3300 "vil libes kint nu blip alhie
0,3301 vntz du besiehest wie ez vns ergat"
0,3302 hin ranten sie den potestat
0,3303 sluc tristan d' degen vrut
0,3304 Mit kreften durch den pekelhvt
0,3305 vntz vf die zvngen hin zv tal
0,3306 Imedes ovch curuenal
0,3307 zv tode zwene schergen sluc
0,3308 da waz gesame-tes bovels gnuc
0,3309 daz lief hin dan vn- vloch den tot
0,3310 svs wart die mine-clich ysot
0,3311 die man da solde toten
0,3312 erloset von den noten

0,3313 vur sich hub sie h' tristant
0,3314 vf sin ros vn- reit zvhant
0,3315 hin wid' da tantrisel waz
0,3316 daz vrowte sich da sie genaz
0,3317 ysot die blunde kvnigin
0,3318 ey wo quamen sie nv hin
0,3319 sie riten ot vaste in den walt
0,3320 Ir trachten daz waz manicwalt
0,3321 nv svchten die gehiwer
0,3322 ab' die fossiwer
0,3323 die meist' gotfrit hat genant
0,3324 Ia fossiwer a la gant amant
0,3325 d' minne grube d' minne hol
0,3326 da inne in vor waz so wol
0,3327 vn- sie d' nicht en vunden
0,3328 sie machten an den stunden
0,3329 von rinden vn- von lovbe
0,3330 vz schilfe vn- vz schawbe
0,3331 eine hutte groz vn- wit
0,3332 dar inne vortriben sie die zit
0,3333 die gar getriwen wiere
0,3334 nv quam d' kvnic schiere
0,3335 wid' vn- wart gewar
0,3336 daz die kvneginne clar
0,3337 la bele die schone ysot
0,3338 waz entrunnen vz d' not
0,3339 Der edele kvnic d' gyte man
0,3340 Mit vlizen denken began
0,3341 In sinen h'zen reine vn- phin
0,3342 "diz mvz gotes wille sin
0,3343 der hat in z war geholfen hin
0,3344 Tristan vn- d' kvnegin
0,3345 sie genizon lichte ir vnschult"
0,3346 von den gedanken er gedult
0,3347 vn- gvten mvt gewan
0,3348 wes lebte da h' tristan
0,3349 vn- die kvnegin ysot
0,3350 ob sie diekeiner slachte not
0,3351 von hvngere liden nein sie z war
0,3352 sie hetten gvte lipnar
0,3353 ane brot vn- ane win
0,3354 wiltberte so ez beste sin
0,3355 Mochte in dem walde vb'al
0,3356 des schoz in vil da curuenal
0,3357 schone er ez briet vn- sot
0,3358 vn- loste sie von hvngers not
0,3359 vn- gap in dar zv luter transc
0,3360 vz einen velse d' entspranc

0,3361 den trunken die gelieben hie
0,3362 w'lich vn- duchte sie
0,3363 d' beste welsche win
0,3364 d' in den landen mochte sin
0,3365 vn- waz ie h' tristan
0,3366 gvter spise mochte han
0,3367 Mit der edelen kvneginne
0,3368 ydoch tet in glunde mime
0,3369 Mit rechter h'zenliebe bas
0,3370 waz tantrisel da gas
0,3371 vn- curuenal als ich s v'ste
0,3372 so het eines gerichtes me
0,3373 Ie d' edele tristan
0,3374 des besten daz ie man gewan
0,3375 vn- in d' werlde mochte sin
0,3376 Mit d' blunden kvnegin
0,3377 daz waz die svze minne
0,3378 die spiset in h'ze vn- sinne
0,3379 daz sie des duchte sie hetten gnuc
0,3380 des alles . waz die erde truc
0,3381 Da sie nv als ich han gelesen
0,3382 In diser wilde gewesen
0,3383 waren vil nahen ein halbes iar
0,3384 nu gefuget ez sich ver war
0,3385 daz tristan durch tagalt
0,3386 Solde riten in den walt
0,3387 Curuenal der helt gemeit
0,3388 Mit sinem herren da reit
0,3389 ysoten vn- tantrisel die
0,3390 lisen bi einandir sie
0,3391 In der buden alleine
0,3392 Nu reit Tristan d' reine
0,3393 vn- der w'de Curuenal
0,3394 den walt allez zu tal
0,3395 sie schvzzen vasande
0,3396 vn- vogle manger hande
0,3397 vn-d'wilen schozzen sie ein tier
0,3398 svs riten dise helde fier
0,3399 In dem walde vaste hin
0,3400 die wile gienc die kvnegin
0,3401 vn- daz kint Tantrisel
0,3402 vn- brachen blude risel
0,3403 von manges bowmes aste
0,3404 vil blumen sie da vaste
0,3405 vn- krvter vf sich luden
0,3406 da mite sie ir buden
0,3407 wolden schone zieren
0,3408 bestowen vn- florezieren

0,3409 wenne d' edele tristan
0,3410 queme daz er solde han
0,3411 sine lust dar inne
0,3412 svs gienc die kvneginne
0,3413 In dirre kvrtzewile
0,3414 wol eine welsche mile
0,3415 von d' hutten hin dan
0,3416 blume- lesende in dem tan
0,3417 Die wile vn- an den stunden
0,3418 waz ovch mit den hunden
0,3419 d' kvnic durch sin tagalt
0,3420 geriten in de- selben walt
0,3421 er het v'einet vn- v'iaget
0,3422 als mir dise aventiwer saget
0,3423 von den anderen v're sich
0,3424 die kvnegin gar minnendlich
0,3425 die vant er in dem walde dort
0,3426 da sie d' blvmen eine- hort
0,3427 vf sich vazzet vn- uf sich lut
0,3428 d' einvaltige kvnic gut
0,3429 gedachte "h're waz mac diz sin
0,3430 Ist ez ysot die kvnegin
0,3431 w' hat sie danne bracht da her"
0,3432 vn- also gehielt ovch er
0,3433 vn- sach gar einecliche dar
0,3434 da wart er rechte gewar
0,3435 daz sie ez waz die schone ysot
0,3436 da leit er von gedanken not
0,3437 waz er nv tvn mochte
0,3438 daz sinen wurden tochte
0,3439 Inredes sach sie ovch dar
0,3440 vn- wart des kvneges gewar
0,3441 daz er so nahen bi ir hilt
0,3442 Ir h'ze grozer liste wielt
0,3443 sie gienc vur sich vn- tet
0,3444 sam sie sin nicht gesehen het
0,3445 d' kvnic wart ovch nicht gewar
0,3446 daz sie het gebilket dar
0,3447 ysot sprach zv dem knidelin
0,3448 "Sag an wie lange mac des sin
0,3449 das mein swager tristan
0,3450 Mich so menlich als ein man
0,3451 von dem tode erlost
0,3452 da man mich auf dem roste
0,3453 solde han lesterlich vorbrant"
0,3454 dem kindelin waz vmbekant
0,3455 waz die vrowe meinte
0,3456 sie winket im vn- erscheinte

0,3457 Mit ir splinden ougen daz
0,3458 Sie weste neuwes etwas
0,3459 vn- nach der ougen grvs
0,3460 Trat sie dem kinde vf dem fvs
0,3461 der kvnic aller der geschicht
0,3462 prvfete noch en merkte nicht
0,3463 vn- nam ir winkens nicht war
0,3464 abir ir rede horte er gar
0,3465 Tantrisel daz knebelin
0,3466 antwort alsus der vrowe- sin
0,3467 wan iz was kvndekeite vol
0,3468 ez iach “vrow er wisset ez wol
0,3469 oder leichte vil bas dan ich”
0,3470 do sprach ysot “sin dvnket mich
0,3471 ytzent vil nach ein halbes iar”
0,3472 daz kint sprach “vrow ir habit war”
0,3473 Sie sprach “wie gar er tristan
0,3474 sich aller dinge dvnket ein man
0,3475 doch tet er an vns als ein zage
0,3476 das er an dem selben tage
0,3477 vor vorchten also von vns reit
0,3478 vn- vns in diser arbeit
0,3479 hat gelan so mänge zeit
0,3480 zeter sei vber sie geschreit
0,3481 die mich vn- den gyten man
0,3482 also lesterlichen han
0,3483 Mit ir valschem list verlogen
0,3484 vn- lügenlich betrogen
0,3485 Gegen dem lieben h’ren mein
0,3486 dem kv-ge der mir nicht gesein
0,3487 Mochte gesin dan er ist
0,3488 vn- ie waz in aller vrist
0,3489 sint daz ich sinem libe
0,3490 gegeben wart zv wibe
0,3491 nv haben die valschen trugen’e
0,3492 Mich im gemachet gar vngem’e”
0,3493 sie sprach “tantrisel libes kint
0,3494 Mich wundert daz wir zwei sint
0,3495 so lange alleine hie gewesen
0,3496 In dirre wuste vn- wir genesen
0,3497 vor ma-chem wildem tiere sin
0,3498 vn- daz wir wed’ brot noch win
0,3499 Noch andere spise han gehabet
0,3500 wan daz wir vns han gelabet
0,3501 Mit wazz’ vn- vns han ernert
0,3502 Mit kruten die wir han v’zert
0,3503 min schopfer got d’ svze
0,3504 d’ wil daz ich hie buz

0,3505 Min svnde in diser wilde
0,3506 vn- daz ich menschenbilde
0,3507 sol lichte nimmer me gesehn
0,3508 vn- danke gote daz geschehn
0,3509 Mir die genade von im ist
0,3510 vil libes kindel daz du bist
0,3511 bi mir in dirser wuste hie”
0,3512 Mit diser red ersufczte sie
0,3513 gar inneclichen vn- sprach
0,3514 vz listigem herzen “ach
0,3515 kvnic marke lib’ h’re min
0,3516 daz wir alsus gescheide- sin
0,3517 von einand’ durch luge
0,3518 vn- mit valscher nid’ truge”
0,3519 Mit diser red manich heizz’ zar
0,3520 vz ir spilden ovgen clar
0,3521 alda begonde wallen
0,3522 sie liz die wurze vallen
0,3523 vn- die blume- die sie truc
0,3524 sie wante ir wizen hende gnuc
0,3525 vn- saz nid’ in den cle
0,3526 waz sol nv diser rede me
0,3527 Diz sach vn- horte make
0,3528 vn- iamert in vil starke
0,3529 er het gesworn des eine- eit
0,3530 daz dise rede icht kvnterpfeit
0,3531 were die er horte da
0,3532 vn- saz vo- sine- pferde sa
0,3533 vn- lief die richte hin
0,3534 da sie saz die kvnegin
0,3535 vor sie viel er vf sine kye
0,3536 vn- vmb vienc mit armen sie
0,3537 er kuste sie an den roten mvnt
0,3538 vt bat sie liplich an d’ stunt
0,3539 daz sie v’gebe im die schult
0,3540 daz er siner vngedult
0,3541 sie wolde haben getotet
0,3542 vnd daz er sie genotet
0,3543 hette also lesterliche
0,3544 da sprach die tugentriche
0,3545 ysot die blunde kvnegin
0,3546 “kvnic marke lib’ h’re min
0,3547 vor gote ich vch v’gebn han
0,3548 waz ir mir leides hab getan
0,3549 Mit vrlovbe mvz ich des iehn
0,3550 vn- ab daz were geshehn
0,3551 an mir enlendem wibe
0,3552 daz ir mich von den libe

0,3553 ane schult vn- vnv'dacht
0,3554 In iwerem zorne hetet bracht
0,3555 In den schanden vn- in de- schame-
0,3556 z war daz were uvere- hohen name-
0,3557 doch ein vil cleines prisel"
0,3558 Inredes Tantrisel
0,3559 nam des kvneges ros gvme
0,3560 vn- vn- hilt ez bi dem zowme
0,3561 Marke d' kvnic hochgeborn
0,3562 begende blasen da sin horn
0,3563 ob ez iman v'neme
0,3564 daz er zv im queme
0,3565 vnd' sinem iagetgesinde
0,3566 er hvrnet also swinde
0,3567 vn- wart hornschal also groz
0,3568 daz d' walt da von erdoz
0,3569 Der truchtseze Tynas
0,3570 Mit sin iagetgesellen was
0,3571 dem kvnege also nahen kvme-
0,3572 daz er wol hette v'nvme-
0,3573 sin hornzeichen vn- sin horn
0,3574 durch mos durch disteln vn- durch dorn
0,3575 durch holtz vn- durch vb' gevilde
0,3576 quam er in der wilde
0,3577 nach des hornes doz gerant
0,3578 da er den kvnic sitzen vant
0,3579 bi siner kvneginne
0,3580 diz nam in in dem sinne
0,3581 wund' vber wunder .
0,3582 vn- wu-dertte besvnder
0,3583 alle die mit im quamen
0,3584 vn- dise mer v'namen
0,3585 doch vrouten sie gemeineclh
0,3586 von inneclchem h'zen sich
0,3587 des vundes den sie vunden
0,3588 heten in den stunden
0,3589 In wart da wrowde- me betaget
0,3590 wan ob sie hetten eriaget
0,3591 Tvsent hirze od' tusent swin
0,3592 d' kvnic von d' kvnegin
0,3593 seite in gemeineclich die mer
0,3594 wie sie hete vunde- er
0,3595 clagende in den grune- kle
0,3596 vn- wie im tet von h'zen we
0,3597 vn- in erbarmte swinde daz
0,3598 sie so clegelichen saz
0,3599 vn- er waz er horte reden sie
0,3600 da saite er in allen hie

0,3601 vn- daz ez also geschach
0,3602 daz sie des kvneges nicht en sach
0,3603 Die rede laze wir nu sin
0,3604 der kvnic nam die kvnegin
0,3605 vn- vurte sie mit im wider
0,3606 Heim vn- lebte mit ir sider
0,3607 gar mime-cliche- alle vrist
0,3608 Tantrisel mit grozer list
0,3609 hette sich hin dan gestoln
0,3610 vn- quam gelovfen v'holn
0,3611 zv d' hutten wid' hin
0,3612 Tristande suchte ez vn- vant in
0,3613 vn- waz alrerst d' werde
0,3614 gesezze- von dem pferde
0,3615 vn- er daz kint alleine sach
0,3616 kvme- . al svfczende er iach
0,3617 als im sin triwe gobot
0,3618 "wo ist die kvnegin ysot
0,3619 vil libes kint daz sage mir"
0,3620 daz kint sprach "ohem ich sage ez dir
0,3621 Ich vn- ysot min vrowe
0,3622 wir giengen in dem towe
0,3623 vn- lazen blume- vn- krut
0,3624 da quam d' kvnic vn- na- sin trut"
0,3625 "welch kvnic" sprach er tristan
0,3626 "Kvnic marke ir elich' man
0,3627 Min ohem vn- d' dine"
0,3628 "o we der h'zen pine
0,3629 vn- des leides des mir ist
0,3630 enstanden nv in diser vrist
0,3631 so hat daz mine-cliche wip
0,3632 verlorn iren zarten lip
0,3633 die mine hant mit all' not
0,3634 erlorst von des todes not"
0,3635 daz kindel sprach zv im also
0,3636 "lieb' ohem min bis vro
0,3637 ir wirret zv den lebe- nicht"
0,3638 ez saget im alle die geschicht
0,3639 wie sie des kvneges wart gevar
0,3640 vn- wie sie brachte ire rede dar
0,3641 Mit so subschlicher list
0,3642 vn- wie d' kvnic in d' vrist
0,3643 ir so lieplich engegen lief
0,3644 vn- sie so vruntlich vmbeswief
0,3645 vn- also gutlich sie bat
0,3646 daz sie im v'gebe an d' stat
0,3647 waz er gein ir ie getet
0,3648 vn- wie er nach d' selben bet

0,3649 sie kvste an iren roten mvnt
0,3650 des wart h' tristan an d' stunt
0,3651 von h'zen inneclichen vro
0,3652 vn- sprach zv dem kinde also
0,3653 "sage an sach ab' d' kvnic dich"
0,3654 ez sprach "ia ohem er sach mich
0,3655 vn- ich hilt im sin pfert"
0,3656 "o we" sprach d' degen wert
0,3657 "vure ich dich danne mit mir hin
0,3658 das wirt vil lichte ir vngewin
0,3659 d' blunden kvneginne
0,3660 d' kvnic hat scharfe sinne
0,3661 vn- v'sicht sich vnser hie
0,3662 so wirt betrubet ab' sie
0,3663 vn- kvmt die bele blunde ysot
0,3664 vil lichte des in eine not"
0,3665 Er vurte daz kindel an ein pfat
0,3666 daz ez truc hin gein d' stat
0,3667 vn- sprach zv im "nv lovf hin in
0,3668 vn- sage d' blunde kvnegin
0,3669 daz sie got mvze bewarn
0,3670 ich welle in irm dinste varn
0,3671 war mich got gelaze"
0,3672 daz kint lief sine straze
0,3673 hin vf daz hvs zv Tyntaiol
0,3674 alda wart ez enpfange- wol
0,3675 vn- vant da mage vn- man
0,3676 ey waz tut nv her tristan
0,3677 da kerte er ab' drate
0,3678 Mit Cvruenalis rate
0,3679 wid' vf den wilden se
0,3680 vn- vur hin gein arundele
0,3681 vn- als er quam zv karke
0,3682 des vrowte sich vil starke
0,3683 d' h'zoge vn- die h'zogin
0,3684 vn- sin swager kaedin
0,3685 vn- die wizgehande ysot
0,3686 gar minnenclich erbot
0,3687 die viere gein im giengen
0,3688 vn- in mit kvsse enpfiegen
0,3689 Nv waz ab' die iunge
0,3690 ysot in hoffenvnge
0,3691 daz er ir vrowde solde geben
0,3692 vn- daz er mit ir wolde leben
0,3693 als liep mit liebe leben sol
0,3694 sie het die zit gemerket wol
0,3695 vn- weste daz v' war
0,3696 daz ein ende het daz iar

0,3697 des gelubdes das Tristan
0,3698 solde haben getan
0,3699 als er ir hette gesaget
0,3700 da er so lange sie liez maget
0,3701 Unde ab' als ez nacht wart
0,3702 vn- sich geleit die maget zart
0,3703 hette zv dem manne
0,3704 nv lac ot tristanne
0,3705 die blunde ysot in h'zen
0,3706 von d' er sulch' smerzen
0,3707 In rechter h'zenlibe leit
0,3708 daz er ysoten meit
0,3709 Mit werken vn- mit all' tat
0,3710 da mite gemachet schire hat
0,3711 eines iungen degenes lip
0,3712 vz ein' megde ein schone' wip
0,3713 waz sol ich sprechen me hie von
0,3714 h' tristan lac ab' recht als ein ron
0,3715 als ich han gesprochen e
0,3716 daz tet d' megde h'zen we
0,3717 vn- waz ir leit vn- tet ir not
0,3718 "Mich wundert sin" gedacht ysot
0,3719 "daz d' gevuge tristan
0,3720 Nicht zv vrowe- liebe kan
0,3721 vn- ist sin nam doch so groz
0,3722 vn- ist wol all' d' genoz
0,3723 die mit ritterlichen siten
0,3724 pris vn- wurde han erstriten
0,3725 vn- giht man waz die kvne- degen
0,3726 Manheit vn- ritterscheffe pflegen
0,3727 daz geschehe allez durch die wip
0,3728 so hat h' Tristan sinen lip
0,3729 wund'lich vntz h' verzert
0,3730 wan im sulches nicht beschert
0,3731 Ist gewesen in kein' vrist
0,3732 daz wibes lon geheizzen ist
0,3733 wan er den wiben nicht en towk"
0,3734 ir selbes sin sie hier an trowk
0,3735 wie vil sie d' gedanken pflac
0,3736 ydoch h' tristan bi ir lac
0,3737 daz sie von sinem libe
0,3738 nicht wart zv einem wibe
0,3739 vn- er lange daz getreip
0,3740 daz ysot alles maget bleip
0,3741 Nv vuget ez sich an eine- tage
0,3742 nach diser aventiwere sage
0,3743 daz d' h'zoge lovelin
0,3744 vn- karsie die h'zogin

0,3745 vn- kaedin lyfrenis
0,3746 vn- ysot blantschewanis
0,3747 durch kvrczewile riten iagen
0,3748 sie hiez tristante sagen
0,3749 vn- mit vlize biten in
0,3750 daz er rite mit in da hin
0,3751 er werte schire sie d' bet
0,3752 wan er ez doch vil gerne tet
0,3753 als sie nv quame- vf daz velt
0,3754 ysote- pfert gienc schone in zelt
0,3755 nv reit die kurtesie
0,3756 bi ein' wagenleise
0,3757 da waz vz eine- bru-ne
0,3758 ein wezzerln in gerume
0,3759 vn- bi dem wezzerline
0,3760 stunden in lichtem schine
0,3761 gelwe blume- vn- grunes gras
0,3762 ysot also gesitet was
0,3763 vn- waz ir ovch gezeme gnvc
0,3764 daz sie stetes gerne truc
0,3765 ein vrisches blumenkrenzelin
0,3766 vf dem gebenden sidin
0,3767 vn- sie die blumelin ersach
0,3768 nv mvget ir horn waz geschach
0,3769 ysoten sie an lachten
0,3770 vn- mit ir schine machten
0,3771 daz sie von dem pferde trat
0,3772 vn- trat gerichte an die stat
0,3773 hin da daz wezzerlin vloz
0,3774 daz wazzer von dem trite schoz
0,3775 als mir diz buch gesaget hat
0,3776 d' magde hin vnd' ire wat
0,3777 ysoten vuz ez da betwanc
0,3778 daz ez hin vf vaste spranc
0,3779 hin an daz engerlin also zart
0,3780 da von d' hvbsche nithart
0,3781 sanc als ich v'nvme- han
0,3782 "alda die brvnen blumen stan"
0,3783 Und als daz engerlin wart naz
0,3784 ysot mit rede nicht zv laz
0,3785 waz vn- ir dise geschicht geschach
0,3786 sie begonde smilen vn- sprach
0,3787 nicht alzv lute in d' vrist
0,3788 "diz wazzer verre kvner ist
0,3789 wan d' kvne tristan
0,3790 d' iglichem man ein man
0,3791 Manlichen wol gewesen tar
0,3792 d' en torste nie geruren dar

0,3793 an die minnenche stat
0,3794 da hin mich nv geruret hat
0,3795 ane sin ditz wezzerlin”
0,3796 die rede erhort kaedin
0,3797 vn- sprach alsvs d’ magde zv
0,3798 “swester min waz spriches du”
0,3799 “nicht” sprach die wizgehande ysot
0,3800 er iach “swester ich mvz tot
0,3801 dvrch die rede geligen
0,3802 ob sie mir von dir wirt v’swige-”
0,3803 vn- sie des brud’ erst ersach
0,3804 sie ersvftzet vn- sprach
0,3805 “Min lib’ brud’ lyfrenis
0,3806 Ich arme ysot blantschemanis
0,3807 sage ez vf genade dir
0,3808 daz h’ tristan hat bi mir
0,3809 also lange zit gelegen
0,3810 vn- allez dez nicht hat geflege-
0,3811 noch nicht begange- mit mi-ne- libe
0,3812 dez ie man mit liebe- wibe
0,3813 In diser werlde begienc”
0,3814 die rede kaedin gevienc
0,3815 nicht ane zorn in sinem mvt
0,3816 vn- sprach “ysot min swest’ gut
0,3817 swic vn- sage die rede niman
0,3818 vil wol ich dir ervaren kan
0,3819 an im wur umb daz sie
0,3820 Ist da icht valscher kvtte bie
0,3821 ez gildet mir tristan des leben
0,3822 dez wil ich dir min triwe geben”
0,3823 Uon ir gienc er san zvhant
0,3824 hin da er tristan den vant
0,3825 Mit diser rede hup er an
0,3826 vn- iach “min lib’ vrunt tristan
0,3827 Min swager vn- min geselle
0,3828 dez ich dich vragen welle
0,3829 daz solt dv nemen vor gvt
0,3830 vn- sage mir wez hast dv mvt”
0,3831 “wez han ich mvt” sprach tristan
0,3832 “daz du ysoten hast gelan
0,3833 also lange stunde maget”
0,3834 er iach “w’ hat dir daz gesaget”
0,3835 “Ich weiz ez vn- wil wezzen daz
0,3836 war vmme du ir sies gehaz”
0,3837 “Ich ir gehaz .” sprach tristan
0,3838 “ia als ich gesprochen han”
0,3839 sprach sin swager kaedin
0,3840 Tristan sprach “vf die triwe min

0,3841 daz ich ysoten minne
0,3842 mit h'zen vn- mit sinne
0,3843 vnd daz ich die vil reine
0,3844 Mit gantzen triwe- meine"
0,3845 er meinet ab' gene and' ysot
0,3846 die im s so minnenlichen erbot
0,3847 die bele blunde vz irlant
0,3848 kaedin sprach san zvhant
0,3849 "ey wie mak ymmer kvme- daz
0,3850 dv ysoten nicht gehaz
0,3851 bist vn- also bi ir ligest
0,3852 vn- d' dinge nicht en pfligest
0,3853 d' ie manlicher man
0,3854 Mit libes wibes lip began
0,3855 ich sage dir s w'lich vor war
0,3856 ist daz ich gentzlich ervar
0,3857 daz du min swest' smehen wilt
0,3858 eines spilez wirt mit dir gespilt
0,3859 daz dine vrunt beginnen clagen
0,3860 Ich wil ez minen vater sagen
0,3861 vn- ovch d' liben mvter min"
0,3862 "Nein lib' vrunt kaedin"
0,3863 so sprach d' edele tristan
0,3864 "die rede solt du durch mich lan"
0,3865 "Ich laze ir nicht vf mine- eit
0,3866 dv en sagest mir die warheit
0,3867 von welhen sachen ez sie
0,3868 daz dv min' swester bie
0,3869 ligest vn- sie lazsest maget
0,3870 sie ist d' iare wol betaget
0,3871 volwaschen vn- schone gnvc
0,3872 nie keiser krone getruc
0,3873 vn- solt er minen ein wip
0,3874 Im en were ysote lip
0,3875 gnuc edel vn- wolgeborn"
0,3876 Tristan sprach "laz dinen zorn
0,3877 vn- hab einen gvten mvt
0,3878 Ich sage dir stoltzer degen vrut
0,3879 ein sulch' mere da mit ich wol
0,3880 die hulde din gewinne sol"
0,3881 da sprach ab' kaedin
0,3882 "waz meres mochte daz gesin
0,3883 Mir wurde denne von dir gesaget
0,3884 war vmb dv so lange maget
0,3885 hast mine swest' gelan"
0,3886 "wilt du z in gvte vorstan
0,3887 so wil ich ez sagen dir"
0,3888 hie mite erlachte wol zwir

0,3889 d' hochmvte lyfrenis
0,3890 wan er tristande in alle wis
0,3891 liep het in dem h'zen sin
0,3892 er iach "sprich an swage min"
0,5719 Urlovp nam ovch Tristan
0,5720 von Tynase zv Lytan
0,5721 vn- vur vf d' wilden se
0,5722 hin wider gein arundele
0,5723 Mit im die zwene gesellen sin
0,5724 Cvruenal vn- kaedin
0,5725 die wile daz sie vuren hin
0,5726 kaedin sprach wider in
0,5727 "vil liber swager Tristant
0,5728 Tv dine triwe an mir bekant
0,5729 vn- rat mir zv einem dinge
0,5730 daz mir dar an gelinge .
0,5731 daz dine ich ymmer wid' dich"
0,5732 Tristan sprach "kaedin nv sprich
0,5733 waz du meinest daz sage mir
0,5734 dar zv daz beste rat ich dir"
0,5735 er iach "da ienehalp der se
0,5736 da stozet an arundele
0,5737 ein riches vn- ein schones lant
0,5738 da ist Gamaret genant
0,5739 dar inne schone erbuwen lit
0,5740 ein veste hvz groz vn- wit
0,5741 als vnser hvz zv karke
0,5742 daz ist genant gamarke
0,5743 vf d' burc ist gesezzen
0,5744 ein degin gar vermezzen
0,5745 d' mit ritterlicher tat
0,5746 vil hoher wurde erworben hat
0,5747 vn- dar zv ritterlichen pris
0,5748 d' ist genant Nampotenis
0,5749 sin manheit ist gar manicvalt
0,5750 sin triwe reine vn- ane gewalt
0,5751 Ist er wol vursten genoz
0,5752 vn- mir an adel ebengroz
0,5753 der hat eine so schones wip
0,5754 daz nie minnenclicher lip
0,5755 von wibes libe vf erden
0,5756 Geborn torste werden
0,5757 Die svze wandels vrie
0,5758 genennet ist kassie
0,5759 Gein d' min h'ze libe treit
0,5760 wan wir in vnser kintheit
0,5761 mit einand' sin gezogen
0,5762 vn- haben grozer libe gepflogen

0,5763 von kinde mit einand' vntz her
0,5764 Nv ist daz mines h'zen ger
0,5765 daz ich sie gerne wolde sehen
0,5766 ob mir ein heil mochte geschehen
0,5767 mit dinem rate vrunt tristant"
0,5768 "wie ist ez vmbe daz hvz gewant
0,5769 da sie da ist" sprach Tristan
0,5770 "des ich dich wol bescheiden kan
0,5771 vf einem brege hoch erhaben
0,5772 liget es vn- ist al vmbegraben
0,5773 Mit graben die gar tief sin
0,5774 vn- get nuwan ein tor dar in
0,5775 vn- wenne daz tor geslozen ist
0,5776 So en wart nie in keiner vrist
0,5777 so kleine ein vogel noch ein mvz
0,5778 da' mvge kvmen in daz hvz
0,5779 So gar ist ez vormachet
0,5780 v'mvret vnd bedachet
0,5781 d' wirt die sluzzel selbe hat
0,5782 wenne er vz ritet od' gat
0,5783 So lat er ir von im nicht
0,5784 vn- vmbe die selbe geschicht
0,5785 han ich so lange zit v'triben
0,5786 daz ich bin vngetrostet b-liben
0,5787 vn- vngevrowet von ir
0,5788 sie treit doch gyten willen mir
0,5789 daz weiz ich sicherlichen wol
0,5790 ob ich s mit lovbe sprechen sol"
0,5791 Da sprach d' edele Tristan
0,5792 "dar zv ich dir wol raten kan
0,5793 swic vn- hab-e gyten mvt"
0,5794 nv quamen ovch die helde vrut
0,5795 von dem wazzer an daz lant
0,5796 kaedin tet im b-ekant
0,5797 Daz lant h-eize Gamaroch
0,5798 Tristan sprach "nv sage mir doch [...]..."
0,5982 er sprach "meist' vurd't mich
0,5983 Mit disen werke in diser zit
0,5984 des ir von mir getiwe'et sit
0,5985 vn- ich vch helfe vn- gebe
0,5986 die wile ir lebet vn- ich lebe"
0,5987 den smit da mit erschrakt er
0,5988 wan im die karakter
0,5989 waren alzv meist'lich
0,5990 idoch v'stunt er des wol sich
0,5991 daz er daz werc wol kvnde
0,5992 ob er dar zv di stunde
0,5993 vn- gvte mvze hette

0,5994 d' smit sprach "h're ich tete
0,5995 daz uwer wille were
0,5996 ob mir daz werc so swere
0,5997 were nicht alsam ez ist
0,5998 Ich en kan sin nicht in kvrtz' vrist
0,5999 volbringen des gelovbet mir"
0,6000 er sprach "gvt vrunt laz shinen dir
0,6001 vn- tu ez so du schierste macht"
0,6002 d' smit sprach "vb' vierzehen nacht
0,6003 die sluzzel werden bereit"
0,6004 d' rede wart kaedin gemeit
0,6005 Der smit waz siner kvnste kluc
0,6006 er konde smidew'kes gnv
0,6007 vb' disem werke er ylte
0,6008 er smitte er grup er vilte
0,6009 vntz die sluzzel bereit
0,6010 wurden . da wart ez gereit
0,6011 von im kaedine
0,6012 d' nam die sluzzel sine
0,6013 von disem wercma-ne
0,6014 vn- brachte sie Tristanne
0,6015 vn- liez in sie schowen
0,6016 Tristan sprach "dine vrowen
0,6017 die schone- kassyen
0,6018 dines h'zen amien
0,6019 die solt u w'lich nv sehen"
0,6020 er sprach "wenne sol daz geschehen
0,6021 daz tu lib' vrunt mir bekant"
0,6022 "ie e . ie bezzer" sprach Tristant
0,6023 "biz morge- sul wir riten dar
0,6024 daz sin nyman w'de gewar
0,6025 wo hin wir kvme- od' wo wir sin"
0,6026 Tristan vnd Kaedin
0,6027 des morgens var von karke
0,6028 Riten gein Gamarke
0,6029 sie zwene alleine riten da hin
0,6030 vn- ein mensche nicht mit in
0,6031 da sie geriten den tac
0,6032 vor gamarke in den hac
0,6033 des nachte sie da quamen
0,6034 h'berge sie da namen
0,6035 die zwene helde kvne
0,6036 vnd' einem bovmen grvne
0,6037 vntz ez des morgens tagete
0,6038 vn- sie d' tac vf iagete
0,6039 Sie lagen an dem selben tage
0,6040 allez wartende in dem hage
0,6041 wenne d' wirt des hvses rite

0,6042 nampotenis nach sinem site
0,6043 iagen als er e . het getan
0,6044 nv sahen sie daz tor vf gan
0,6045 d' wirt des hvses reit her vor
0,6046 vn- sloz selbe zv daz tor
0,6047 die sluzzel er bie im hilt
0,6048 Tristan d' ie manheit wielt
0,6049 vn- sin gelle kaedin
0,6050 sahen alle die geberde sin
0,6051 Er reit vb' daz gevilde
0,6052 hin vaste gein d' wilde
0,6053 vn- als sie gesahen in
0,6054 riten vaste von in hin
0,6055 vb' daz gebirge wol hin dan
0,6056 kaedin vn- Tristan
0,6057 die quamen an die burc geriten
0,6058 vn- sluzzen vf . wiplich' siten
0,6059 des hvses wirtinne pflac
0,6060 sie sach sie kvmnen vn- erschrac
0,6061 "ach" sprach daz minne-cliche wip
0,6062 "Ir wolt v'liesen mir den lip
0,6063 vn- vch selbe uw' leben"
0,6064 Tristan sprach "daz sie ergeben
0,6065 gote in die gewalt sin"
0,6066 lyfrenis kaedin
0,6067 die vrowe- hette schire ermant
0,6068 daz im ir minne wart bekant
0,6069 wan er ir in h'zen lac
0,6070 vn- siner kvnste manchen tac
0,6071 hette minne-clich begert
0,6072 nv vurte sie den ritter wert
0,6073 In ein kemenaten san
0,6074 vn- sin geselle Tristan
0,6075 hie vze bi den vrowen bleip
0,6076 die zit kurtzte er in vn- v'treip
0,6077 Mit hubschen dingen sund' zil .
0,6078 der er konde mer danne vil
0,6079 Her Tristan waz vch e wol
0,6080 In dem gezelde bi Tyntaiol
0,6081 da vch die kvneginne
0,6082 gab ire svze minne
0,6083 vn- die maget kameline
0,6084 also efte kaedine
0,6085 Mit irm zovberkvsselin
0,6086 des wil er nv ergetzet sin
0,6087 Im ist ovch hie nicht alzv we
0,6088 wie ez im dar nach erge
0,6089 Ir edele suze minne

0,6090 d' nampotenisinne
0,6091 die kofte er leider tiwer gnvc
0,6092 als mir dise aventiw' gewuc
0,6093 vn- ich h' nach ez mache kvnt
0,6094 kaedin nicht lange stunt
0,6095 alda bi kassyen
0,6096 des wunsches amien
0,6097 In d' kemenaten bleip
0,6098 die vorchte in von d' vrowe- treip
0,6099 er nam vrlovp vn- schiet vo- dan
0,6100 Mit im sin vrunt h' Tristan
0,6101 d' degen manlich . vn- vrut
0,6102 nv hat einen schatehvt
0,6103 von blvme- glantz vn- fin
0,6104 Gemachet d' hvbsche kaedin
0,6105 des morgens dort in dem hage
0,6106 den vurt er vffe als ich vch sage
0,6107 d' helt durch sin hvbscheit
0,6108 vn- er vz der burge reit
0,6109 hin vb' die zogebrucken
0,6110 struchen vn- nvcken
0,6111 begonde sere sin ravit
0,6112 von dem hovbte in d' zit
0,6113 viel im d' hvt in den graben
0,6114 als wir wol v'nvmen haben
0,6115 Er liez in ligen vn- achte sin nicht
0,6116 sie riten hin ach d' geschicht
0,6117 die von dem schatehvte
0,6118 den helden zv vngvte
0,6119 vf diser leiden reise enstat
0,6120 Ich wene ez in an daz lebe- gat
0,6121 d' wirt des hvses san zvhant
0,6122 quam wid' vf daz hvs gerant
0,6123 nampotenis d' degen vrut
0,6124 er sach den leiden schatehvt
0,6125 aldort in dem graben ligen
0,6126 "mich dunket wi wir geste habe-"
0,6127 sprach er selbe wid' sich
0,6128 In grozem zorne grimmedlich
0,6129 gienc er da die vrowe saz
0,6130 er iach "vrowe ich wil wizzen daz
0,6131 wer hie obne bi vch si"
0,6132 sie sprach "aller geste vri
0,6133 sie wir h're w'lich"
0,6134 er suchte vn- suchte alvmbe sich
0,6135 In allen winkelin hin vn- her
0,6136 waz er gesuchte nicht vant er
0,6137 er vant ot niemannes da

0,6138 er gienc zv der vrowen sa
0,6139 vn- iach "w' ist hie gewesen
0,6140 ych laz vch nymmer genesen
0,6141 ob ir die gantzen warheit
0,6142 Mir nicht an stend' stete seit"
0,6143 Mit grozem zorne er da ranc
0,6144 vntz er die vrowen betwanc
0,6145 daz sie im saite alle die geschiht
0,6146 nv waz ovch da svme-s nicht
0,6147 d' wirt sprach "balde wapen her
0,6148 wo nv schilt vn- sper"
0,6149 er wart vil schire an geleit
0,6150 mit im gewapent vn- bereit
0,6151 wurden sibene siner man
0,6152 als er sie beste mochte han
0,6153 Der wirt des erste rante vor
0,6154 vz der burc durch daz tor
0,6155 vn- nach im die gesellen sin
0,6156 Tristan vn- kaedin
0,6157 die waren kvme- durch de- hac
0,6158 Iglich' keiner sorgen pflac
0,6159 sie wanten sie riten ane var
0,6160 nv waz ovch vf sie kvme- gar
0,6161 Nampotenis vn- die sine
0,6162 Tristane vn- kaedine
0,6163 wart vil schire da bekant
0,6164 daz sie quame- vf sie gerant
0,6165 die helde sahen in d' zit
0,6166 daz in tochte da kein strit
0,6167 wan sie waren kvmen dar
0,6168 bloz vn- aller wapen bar
0,6169 nicht mer wer die helde wert
0,6170 hetten denne zwei scharfe swert
0,6171 vn- waren des landes geste
0,6172 vlihen duchte sie daz beste
0,6173 die zwene helde hochgeborn
0,6174 in die ros mit den sporn
0,6175 zv beiden siten slugen
0,6176 Ir snellen ros die trugen
0,6177 Tristane vn- lyfrenise
0,6178 von Nampotenise
0,6179 vb' daz gevelde hin
0,6180 sie weren wol entrunden in
0,6181 da rief ovch Nampotenis
0,6182 "Tristan durch ritterlichen pris
0,6183 kere gein mir kere
0,6184 durch aller vrowe- ere
0,6185 kere durch alle vrowe-

0,6186 vn- laz bi wer dich schowen
0,6187 kere durch ir minne
0,6188 d' blunden kvneginne
0,6189 die nennet ist ysot
0,6190 vn- dir z ie minne-clich erbot
0,6191 kere durch iren lichten schin
0,6192 so keret ir h' kaedin
0,6193 keret durch kassyen
0,6194 Min wip vn- uw' amien"
0,6195 Kaedin vn- Tristant
0,6196 die wurde- mit dem rufe ermant
0,6197 da von sie quame- in not
0,6198 Ir manheit in daz gebot
0,6199 den helden gar geslachten
0,6200 daz sie gein den achten
0,6201 kerten in die vreise
0,6202 Tristan d' kvrteise
0,6203 Rief vf vb' sine crie
0,6204 "permenie permenie"
0,6205 Lyfrenis kaedin
0,6206 rief ovch alhie die crie sin
0,6207 "hie arundel hie karke"
0,6208 "hie gamarke hie gamarke"
0,6209 Rief ir wirt nampotenis
0,6210 Tristan vn- lyfrenis
0,6211 die helde manlich vn- wert
0,6212 Ir scharfen snidegen swert
0,6213 zvcten von den siten
0,6214 ob ich ein langes striten
0,6215 hie gerne machen wolde
0,6216 als ich tzv rechte solde
0,6217 die rede wurde mir ein wicht
0,6218 wan leid' sin geschach hie nicht
0,6219 durch daz Tristan vn- sin genoz
0,6220 waren aller wapen bloz
0,6221 Nampotenis san zuhant
0,6222 vf kaedine quam gerant
0,6223 vn- rach sin h'zenlichez leit
0,6224 daz aller leider ein vberleit
0,6225 Ist in mannes herzen
0,6226 den smerzen aller smerzen
0,6227 Nampotenis da selber rach
0,6228 durch lyfrenisen er stach
0,6229 Sin sper vntz an sin schiben
0,6230 Der ie reinen wiben
0,6231 Sin dinst riterlich erbot
0,6232 der lac hie durch die mi-ne tot
0,6233 der reine suze kaydin

0,6234 waz tot nv d' geselle sin
 0,6235 d' ellens riche Tristant
 0,6236 d' qu-a rechte als ein helt gerant
 0,6237 vf nampotenisen
 0,6238 den suzen Lyfrenisen
 0,6239 Rach er manlichen gnuc
 0,6240 Nampotenisen er da sluc
 0,6241 den manlichen degen fier
 0,6242 Durch helm vn- durch hersenir
 0,6243 Durch houbt drvch hirn drvch suarte
 0,6244 daz im ob dem barte
 0,6245 wid'wante d' slac
 0,6246 Nampotenis da tot gelac
 0,6247 Nv waz gerochen kaydin
 0,6248 Tristan mit dem suerte sin
 0,6249 Liez ot vaste vmbegan
 0,6250 Ez were ros od' man
 0,6251 wem h' behefte einen slac
 0,6252 zuhant ez vor im tot gelac
 0,6253 als gar grimmelich er sluc
 0,6254 d' helt enphienc ovch wuden gnuc
 0,6255 Tief michel vn- groz
 0,6256 Solde her nicht er waz doch bloz
 0,6257 dem edelen Tristande
 0,6258 wer ez nicht ein zchande
 0,6259 Noch kein laster gewesen
 0,6260 Ob er mit vluchte wer genesen
 0,6261 vn- gevlogen were dannoch
 0,6262 da nu d' von Gamaroch
 0,6263 von sinen henden strbens phlac
 0,6264 vn- kaedin ovch tot gelac
 0,6265 Er vlovch ot nicht daz qua- da von
 0,6266 daz er waz vliheng vngewon
 0,6267 di sibene slugen veste vf in
 0,6268 Er sluc ovch vaste wider hin
 0,6269 vf sie sluc er . vn- sluc in sie
 0,6270 vn- rief "hie permanie hie"
 0,6271 vil groser slege vf in gienc
 0,6272 d' etlichen er vienc
 0,6273 vn- schutzte in mit dem swerte
 0,6274 Tristan da strites werte
 0,6275 Di siben vntz daz si q-uame- in not
 0,6276 Ir vunfe da gelagen tot
 0,6277 D' seheste vloch . d' sebende her
 0,6278 Qua- mit eine- gelupten sper
 0,6279 vf den permenoio gerant
 0,6280 Rywalines sun Tristant
 0,6281 Eine wunden da enphienc

0,6282 di im an daz leben gienc
0,6283 ydoch gelac er da nicht tot
0,6284 den ritter bracht er avch in not
0,6285 d' in da stach den sluc er nid'
0,6286 daz er viel zu d' erden nid'
0,6287 vn- dez grimmez todez starb
0,6288 wie nu Tristan gewarb
0,6289 Sol ich daz sagen daz iam't mich
0,6290 Mangen slac vn- mangen stich
0,6291 hette er vn- waz sere wnt
0,6292 ydoch hub er dan d' stunt
0,6293 den toten kaedinen
0,6294 den lieben suager sinen
0,6295 vor sich vf sin kastelan
0,6296 gen karcke vurt e- hin Tristan
0,6297 Lovelin karsye vn- ysot
0,6298 da si kaedinen tot
0,6299 Sahen vn- Tristan waz wnt
0,6300 wart ie drin h'zen iam' kunt
0,6301 daz mochten dise drie wol sien
0,6302 Groz iam' vn- grosen pin
0,6303 Sach man sie erscheinen
0,6304 Mit clagene- vn- mit weinen
0,6305 den liben h'ren sinen
0,6306 den suzen kaedinen
0,6307 daz volk cleget vb'al
0,6308 vn- der gvte Cvrvenal
0,6309 der claget an den stunden
0,6310 Tristandes verschwunden
0,6311 die vrunden im in herzen
0,6312 leit . vn- leides smerzen
0,6313 wol nach vurstlicher art
0,6314 kaedin zv kyrchen wart
0,6315 getragen vn- wart begraben
0,6316 Tristan als wir v'nvmen haben
0,6317 der waz wunt bis in den tot
0,6318 vn- ranc ovch mit des todes not
0,6319 kein ertznie im tochte
0,6320 kein arczt im ovch nicht mochte
0,6321 geraten an den stunden
0,6322 zv den totlichen wunden
0,6323 daz geluppe vrundet im smerzen
0,6324 an libe vn- an dem h'zen
0,6325 vn- bitterliche quale
0,6326 er sprach zv cvrvenale
0,6327 "Cvrvenal ob dir liep ist
0,6328 Min leben vn- min genist
0,6329 So var hin gein Tyntaiol

0,6330 vn- wirp als ich dir sagen sol
0,6331 Sage mymer vrowe- ysoten
0,6332 Man ha-sdele mich vo toten
0,6333 vn- sie v'wundet starke
0,6334 vn- lige alhie zv karke
0,6335 vn- mvge deheine wis genesen
0,6336 sie en wolde mir genedic wesen
0,6337 So daz sie vare her zv mir
0,6338 ich enpfele daz besond' dir
0,6339 ist daz die bele blunde ysot
0,6340 wenden wil mins todes not
0,6341 vn- wil her von Cvrnewal
0,6342 Min vrunt getriw' curuenal
0,6343 So schaffe daz mit dem Marner
0,6344 vn- schikke ez so daz er
0,6345 einen wizen segel an binde
0,6346 des todes ich erwinde
0,6347 ob sie kvmt vn- daz geschicht
0,6348 ist ab' daz sie kvmet nicht
0,6349 so sol d' segel swartz sin
0,6350 daz mich von dem leben min
0,6351 scheiden vn- bringen mak"
0,6352 Cvrvenal der ie triwe pflac
0,6353 d' vur gein Tyntaiole hin
0,6354 die leiden mer d' kvnegin
0,6355 Mit grozem iamer er brachte
0,6356 ysot sich nicht bedachte
0,6357 wed' vmbe diz noch vmb daz
0,6358 an daz schief sie do saz
0,6359 als mir dise aventure seit
0,6360 wem ez liep od' leit
0,6361 were daz achte sie cleine
0,6362 die svse wandels eine
0,6363 ysot die blvnde kvnegin
0,6364 die vur ot zv Tristanden hin
0,6365 Die wile pflac sin ysot
0,6366 blantschewanis als ir gebot
0,6367 Ir wiepliche gyte
0,6368 doch en weiz ich ob si s mvte
0,6369 daz d' halptote Tristant
0,6370 Nach iener ysoten hette gesant
0,6371 d' blunden vz yrlande
0,6372 ysot die wizgehande
0,6373 an daz venster ofte trat
0,6374 als sie Tristan hiez vn- bat
0,6375 vn- nam stetes vur sich dar
0,6376 des schiffes vf dem mere war
0,6377 wenne ez gestrichen queme

0,6378 daz ez Tristan vorneme
0,6379 nv sach sie ez ovch h' strichen
0,6380 Sie tet dem tugentrichen
0,6381 an d' stete san zehant
0,6382 die kvnft des schiffes bekant
0,6383 vn- eine- segel wizen
0,6384 sweben vnd glizen
0,6385 het sie dar ob gesehen
0,6386 des sie nicht im wolde v'iehen
0,6387 er sprach "bele ysot sage an
0,6388 wie ist d' segel getan"
0,6389 ez w'e ir er-st od' ir schympf
0,6390 ez waz ein torisch vngelimpf
0,6391 daz im von ir die warheit
0,6392 In diser not nicht wart geseit
0,6393 Gar ernstlichen sie sprach
0,6394 "eine- suarze- segel ich sach"
0,6395 "Swartz" sprach Tristan "ia" sprach ysot
0,6396 vn- alzhant gelac er tot
0,6397 d' tot im daz h'ze brach
0,6398 so gahes daz er nie sprach
0,6399 diz noch daz wid' ach noch we
0,6400 ysot gar iemerlichen schre
0,6401 "Ich han geschimpfet Tristan
0,6402 d' segel ist wiz den ich da han
0,6403 vf dem mer aldort gesehen"
0,6404 waz sie gerief ez waz geschehen
0,6405 vn- waz sie weine-s gepflac
0,6406 h' tristan alda tot gelac
0,6407 d' tot liez im die mvze nicht
0,6408 daz vil mangem doch geschicht
0,6409 daz er gein d' wende
0,6410 sich kerte vn- neme sin ende
0,6411 Recht als er lac . gelac er tot
0,6412 da er die vrage ysoten bot
0,6413 wie d' segel w'e getan
0,6414 d' aller manheit waz ein man
0,6415 den die reine vrowe clar
0,6416 die svze blantschifflur gebar
0,6417 vn- mit im gebernde
0,6418 ir lebenes enpernde
0,6419 leit des bittern todes not
0,6420 d' lac vor leide in libe tot
0,6421 Der eren riche Tristant
0,6422 den Rval lyfortenant
0,6423 zoch so rechte minne-clich
0,6424 vn- manges kvmmers niete sich
0,6425 do er in hette vorlorn

0,6426 vntz er den h'ren vzerkorn
0,6427 bi marken vant zv cvrnewale
0,6428 d' leit in libe des todes quale
0,6429 Tristant d' iungelinc vil zart
0,6430 d' von marken ritter wart
0,6431 vn- in mit lyfortenande
0,6432 sante wid' heim zv lande
0,6433 gein permenie vn- er dar nach
0,6434 So manlichen sinen vat' rach
0,6435 vn- den kvnic Morgan sluc tot
0,6436 d' leit in libe des todes not
0,6437 Tristan d' wid' zv cvrnewal
0,6438 quam mit vrovde- ane zal
0,6439 vn- da manlichen gnvc
0,6440 den affrican Morolten sluc
0,6441 vn- vriete daz lant
0,6442 von dem zinse mit siner hant
0,6443 als im sein manheit gebot
0,6444 der lac hie durch ysoten tot
0,6445 DEr ellenthafte tristant
0,6446 der den grimen serpant
0,6447 Sluc in yrlant bei weisefort
0,6448 der lac vor leide in liebe mort
0,6449 Tristan der ie nach eren ranc
0,6450 vn- auf dem se den mi-nentranc
0,6451 vnwissende tranc aus dem glaze
0,6452 der treuwen mome der keusche baze
0,6453 Ein tranc mit im die blunde ysot
0,6454 der lac auch in ir minne tot
0,6455 Tristant der ritterschafte pfalc
0,6456 vil vn- vil vn- mangan tac
0,6457 durch ir edle minne
0,6458 der blvnden kvnigi-ne
0,6459 vn- im do zv tyntayoel
0,6460 waz mit ysoten also wol
0,6461 vn- durch sie vur in vremde lant
0,6462 vn- ritterlich mit seiner hant
0,6463 Brach durch ir minne manic sper
0,6464 vor leide in liebe tot lac er
0,6465 DEr hohgemvte tristant
0,6466 der zv gales in daz lant
0,6467 vvr zv dem vursten gylan
0,6468 vn- den risen vrgan
0,6469 Sluc . vn- daz cleine hvndelin
0,6470 Mit dem menlichen ellen sin
0,6471 pytticrev menlich erwarb
0,6472 von herzenliebe in leide strab
0,6473 DEr wol ervarne tristant

0,6474 der in arvndel daz lant
0,6475 quam zv dem vurstē lovelin
0,6476 vn- in von den vinden sin
0,6477 Mit seiner hant erlostē
0,6478 vn- im aldo zv troste
0,6479 Erwarb die wysgehanden ysot
0,6480 Der lac ouch hie zv karke tot
0,6481 Nv wart sein toter leichnam
0,6482 Gebalsemt schon als im gezam
0,6483 vn- vf gibert . vn- wurcze vil
0,6484 vf in getreuwet ane zil
0,6485 vn- wart gegen mvnster getragen
0,6486 weinen schrien vn- clagen
0,6487 horte man in der stvnde
0,6488 von manges menschen mvnde
0,6489 Man kint vn- weip
0,6490 Tristandes iungen suzzē leip
0,6491 Clagetē wan er nv waz tot
0,6492 Idoch leit die meiste not
0,6493 vm in ysot Blantschēmanis
0,6494 Sein elich weip in mänge wis
0,6495 Ginc sie nach der baren clagen
0,6496 vntz er zv mvnster wart getragen
0,6497 vn- man nach cristenlichen dingen
0,6498 Im vigilie solde singen
0,6499 die glocken wurden vbiral
0,6500 Gelautet . nv waz Curvenal
0,6501 zv stade kvmen vor die stat
0,6502 ysot ouch von dem schiffe trat
0,6503 von Curnewal die kvnigin
0,6504 vn- ginc mit Curuenal hin
0,6505 In die stat do horten sie
0,6506 die leute clagen dort vn- hie
0,6507 hie vn- dort ot vberal
0,6508 vn- horten ouch den glockenschal
0,6509 daz arget in vn- vragten san
0,6510 daz volk vm ern tristan
0,6511 der vrage quamen sie in not
0,6512 Einer sprach “nv ist er tot
0,6513 Tristant der treuwen bluende
0,6514 der ie durch eren mvende
0,6515 waz seinen ritterlichen leip”
0,6516 “welch tristan” sprach daz schone weip
0,6517 Sie hofte noch daz ettwē
0,6518 hise tristant alsam er
0,6519 Iener sprach “der pmenoy”
0,6520 Curvenal der curtoys
0,6521 ysoten iamerlich sach an

0,6522 Ir rosenlichte varbe san
0,6523 vnder ir ougen gar vorbleich
0,6524 vn- al ir varbe ir gar entweich
0,6525 zv der erden sie viel
0,6526 In vnmacht [..][..] ken waz' wiel
0,6527 vz ougen der vil claren
0,6528 Leip vn- herz . ir waren
0,6529 Ersteinet von der vnmacht
0,6530 Nv wart ein wasser balde bracht
0,6531 kvrvenal der labte sie
0,6532 Ein cleines creftel sie gevie
0,6533 so daz man kvme an ir enpfant
0,6534 ob sie lebte vn- mit der hant
0,6535 die minne-veige kvnegin
0,6536 wincte gein dem mvnst'e hin
0,6537 sprach sie nicht nein nie kein wort
0,6538 Tristandes tot ir krefte hort
0,6539 vz h'zen ir gezvcket het
0,6540 sie w'e gestorben an d' stet
0,6541 wan daz sie der torst labte
0,6542 vn- der gedinge vf habte
0,6543 die veigen ysoten
0,6544 daz sie also toten
0,6545 Tristanden sehen solde
0,6546 Cvruenal ir holde
0,6547 die kreftelose kvnegin
0,6548 vnd' armen vurte hin
0,6549 an daz mv-st' vn- sie gesprach
0,6550 nie kein wort wed' we noch ach
0,6551 wan daz sie vmbe mit d' hant
0,6552 dort vaste hin da Tristant
0,6553 lac toter vf d' baren
0,6554 Cvruenal die claren
0,6555 hin vurte zv dem toten
0,6556 den grozze- iamer ysoten
0,6557 zv sagene sere iamert mich
0,6558 wie tet die vrowe daz gesage ich
0,6559 da nam sie daz baldekin
0,6560 von dem antlitze sin
0,6561 vn- sach in also toten an
0,6562 vn- viel vf in . vn- ab' san
0,6563 dructe sie an d' selbe- stunt
0,6564 Iren mvnt an sine- mvnt
0,6565 Ire wangen an die wangen sin
0,6566 vn- ir blanken arme fin
0,6567 den toten vmbevingen
0,6568 des todes stoze gingen
0,6569 Ir vaste gein dem h'zen

0,6570 sin tot ir todes smerzen
0,6571 vugete wan er ovch den tot
0,6572 durch sie leit vn- des todes not
0,6573 d' tot inzwei daz h'zen ir brach
0,6574 wed' ach noch we . noch we noch ach
0,6575 gesprach die kvneginne nie
0,6576 Tot vf dem toten lac sie hie
0,6577 dem minnetoten wiebe
0,6578 In sterbendem libe
0,6579 begonde ir h'ze krachen
0,6580 Recht als ob tulent spachen
0,6581 krachten von des viwers not
0,6582 svs gelagen die geliben tot
0,6583 ysot die kvneginne
0,6584 die starp in siner minne
0,6585 Tristandes wan er ovch v'tarp
0,6586 vn- in ir glunde minne starp
0,6587 er starp durch sie vn- sie durch in
0,6588 ysot die tote kvnegin
0,6589 san zvhant vn- mit d' vart
0,6590 gebalsemet vn- beserket wart
0,6591 vn- vf gebert den iammers schal
0,6592 d' vil getriwe Cvrvenal
0,6593 begonde rufen vn- schallen
0,6594 vf sinen toten h'ren vallen
0,6595 sach man in iemerlichen gnvc
0,6596 Mit beiden vusten er sich sluc
0,6597 gar swinde gein d' h'zen
0,6598 die zeswen vn- die lizen
0,6599 In sin har ietwed'e hant
0,6600 er vorwarr vn- vaste want
0,6601 vn- brach ez vz d' swarten
0,6602 die kvnegin die zarten
0,6603 die minnentote ysoten
0,6604 die kvste er also toten
0,6605 Den toten Tristan an d' stunt
0,6606 kvst er ovch den toten mvnt
0,6607 von einen zv dem andern
0,6608 gienc er in iam'e wandern
0,6609 sin h'ze daz getirwe
0,6610 In triwen stete niwe
0,6611 waz sam ein spigel luter
0,6612 "Min h're min truter
0,6613 Trost mines lebenes Tristan
0,6614 ach daz ich dich vorlorn han
0,6615 vn- die suze blunde ysot
0,6616 ach daz die mit dir liget tot
0,6617 dins h'zen trut die kvnegin"

0,6618 Manicvalt d' iamer sin
0,6619 waz vn- sin clegelicher don
0,6620 er iach "sich werlt diz ist din lon
0,6621 den dv zv ivngest gibest in
0,6622 die dir zv dinest iren sin
0,6623 lip vn- h'ze neigen
0,6624 den kanst u kvrke erzeugen
0,6625 die valschen in d' letzten stunt
0,6626 dv strichest in honic in de- mvnt
0,6627 den alten vn- den ivngen
0,6628 wan sie dan mit den zvngen
0,6629 dar nach grifende sin
0,6630 so trovest du in galle dar in
0,6631 din rosenblvme birt den dorn
0,6632 vn- wo dv witze vn- and' korn
0,6633 hin wirfest wenne daz vf gat
0,6634 so birt nvr distelen die sat
0,6635 din zvcker ie des smeckens pflac
0,6636 daz enzvnre sin nachsmac
0,6637 din svze die svret
0,6638 din vrovde truret
0,6639 zv ivngest an des endes zagel
0,6640 din svnne-glast des schvres hagel
0,6641 bringet mit ir schine
0,6642 daz wol an Reywaline
0,6643 wart ovch schin den dv betrüge
0,6644 vn- im daz hemel vur zvge
0,6645 vncz daz er leit des todes not
0,6646 nv liget sin w'd' sun ovch tot
0,6647 Tristan d' libe herre min
0,6648 vn- ysot die kvnegin
0,6649 sich werlt die hat dine svzikeit
0,6650 geclaidet in des todes cleit"
0,6651 Da d' getriwe Cvrvenal
0,6652 alsus mit clageworten qual
0,6653 Inrdes waz achtende
0,6654 d' h'zoge vn- trachtende
0,6655 In grozem h'zenleide
0,6656 wo man dise beide
0,6657 geliben solde begraben
0,6658 nv het ovch marke sich erhaben
0,6659 vf den se von Curnewal
0,6660 Tet im d' nuwe mvntschal
0,6661 ab' we von h'zen
0,6662 vn- vuget im leides smerzen
0,6663 vn- bitterliche swere
0,6664 daz im entrvnnen w'e
0,6665 ysot daz redete vb'al

0,6666 daz volk alda zv cvrnewal
0,6667 dar vmbe d' kvnic marke
0,6668 vur vb' se gein karke
0,6669 ab' vmbe welche geschicht
0,6670 ysot hin vur des weste er nicht
0,6671 er wolt d' kvneginne
0,6672 vn- Tristane durch die minne
0,6673 gevaret haben ir lebnes
0,6674 weiz got daz waz v'gebnes
0,6675 vn- vmbesvs sie waren tot
0,6676 sin neve Tristan vn- sin wip ysot
0,6677 sin wip ysot sin neve Tristan
0,6678 die waren tot . d' gvte man
0,6679 von Curnewale kvnic Marke
0,6680 quam in die stat zv karke
0,6681 Dem h'zoge loveline
0,6682 wart schire die kvmft sine
0,6683 vn- an d' stete bekant
0,6684 d' zogete gein im za zuhant
0,6685 vn- sagete im in den leiden
0,6686 von den geliben beiden
0,6687 wi tristan vn- die blunde ysot
0,6688 yglicher druch daz andere tot
0,6689 In herzenlieben waren gelegen
0,6690 Marke d' kunickliche degen
0,6691 h' sufizt inneclichen vn- sprach
0,6692 "we mir we vn- imm' ach
0,6693 vn- sint sie tot wie kvt daz"
0,6694 d' h'zoge sprach "daz kan vch baz
0,6695 Cvrvenal bescheiden
0,6696 dan yman von in beiden"
0,6697 den kvnic gein dem mvnst' hin
0,6698 vurten sie . da vant er in
0,6699 den werden Cvrvenalen
0,6700 In clegelichen qualen
0,6701 vn- clagende bi den toten dort
0,6702 d' iamer vn- iamers hort
0,6703 behvset het in h'zen
0,6704 d' kvnic mit h'zensmerzen
0,6705 al svftzende vraget in
0,6706 von Tristan vn- d' kvnegin
0,6707 Kvrvenal vorsweic im nicht
0,6708 er seite im alle die geschicht
0,6709 von ir vure vn- von ir leben
0,6710 wie in d' tranc wart gegeben
0,6711 vz dem glase dort vf dem se
0,6712 vn- wie die minne in tet se we
0,6713 von dem tranke d' minne

0,6714 Ir h'ze vn- alle ir sinne
0,6715 wart in beiden enzvnt
0,6716 daz sie en mochten keine stunt
0,6717 die le-ge von einand' sin
0,6718 da er im von d' kvnegin
0,6719 vn- ovch von Tristande
0,6720 [...] [...]
0,6721 vn- im geseit dannoch
0,6722 wie Tristan zv gamaroch
0,6723 wart mit dem geluppe wunt
0,6724 vn- er ez allez im tet kvnt
0,6725 von ende zv ende
0,6726 d' vrevden enlende
0,6727 d' trostlose Marke
0,6728 d' clagete da vil starke
0,6729 sines neven toten lip .
0,6730 er claget ovch daz suze wip
0,6731 "O we" sprach Marke "tristant
0,6732 hettes du daz erst mir bekant
0,6733 vn- hettes mir di gelegeheit
0,6734 von aneenge mir geseit
0,6735 du suzen Rywalinez barn
0,6736 Ich hette z allez vnd'varn
0,6737 Ich hette dinem libe
0,6738 Gegeben zu einem wibe
0,6739 ysoten mine wrowen zart
0,6740 E se mir getruhet wart
0,6741 So were ich vberic gewesen
0,6742 d' sunden vn- werit ir genesen"
0,6743 Er clagete also clegelich
0,6744 daz se alle gemeinlich
0,6745 Mit im clagen bogonden
0,6746 d' h'zoge an den stunden
0,6747 klagete vn- karsye
0,6748 di suze valschez vrie
0,6749 vn- di wizgehande ysot
0,6750 daz di nicht mit den toten tot
0,6751 vor leide lac daz and' ze war
0,6752 Tet sie mit geberden gar
0,6753 In disen leiden Louelin
0,6754 phlac wol di nacht dez gastez sin
0,6755 dez morgens vru di toten
0,6756 Tristan vn- ysoten
0,6757 Man gar heileclich besanc
0,6758 daz volc zu m opfer allez dranc
0,6759 wol nach cristelich' e
0,6760 dar nach truc man sie zu d' se
0,6761 dem edelen kunige Marke

0,6762 legete man s in sine barke
0,6763 d' vurte sie da beide
0,6764 Mit groser herzenleide
0,6765 Mit im heim zu Tintaiol
0,6766 burc vn- stat wart iamers vol
0,6767 vn- clegelicher mere
0,6768 d' vrume vn- d' gewere
0,6769 kvnic hette schire besant
0,6770 Cvrnewale vn- engenlant
0,6771 vursten vn- lanth'ren
0,6772 die minren vn- die meren
0,6773 byschove vn- p-laten
0,6774 die quamen alle drate
0,6775 gemeine hin zv Tyntaiol
0,6776 Ir aller h'ze iamers vol
0,6777 wurde- vn- clegelicher not
0,6778 da sie v'name- daz ysot
0,6779 waz tot vn- ovch h' Tristant
0,6780 vor leide ir iglich' want
0,6781 sine hende al weinende
0,6782 die vrowe- ovch erscheinende
0,6783 ware- clegeliche not
0,6784 daz half ot nicht sie waren tot
0,6785 Nv liez d' kvnic Marke
0,6786 wirken zwene sarke
0,6787 von edelem mermelsteine
0,6788 den reinen vn- die reine
0,6789 vorworchte man dar inne
0,6790 d' toten kvneginne
0,6791 hovbet man da schone
0,6792 Mit zweier lande Crone
0,6793 In dem sarke schonete
0,6794 wan sie die gekronete
0,6795 kvneginne waz bekant
0,6796 von Cvrnewal vn- vo- engenlant
0,6797 Zv Tyntaiol sie gegraben
0,6798 wurden als wir v'nume- haben
0,6799 vf der burc nicht in d' stat
0,6800 d' kvnic die bischove bat
0,6801 vn- alle die p-laten
0,6802 daz sie doch gerne taten
0,6803 ein closter stiften alda
0,6804 alle Telle sente Maria
0,6805 svs wart daz closter genant
0,6806 daz mangem ma-ne ist wol bekant
0,6807 Ich sag es vch wolt ir s nicht enpern
0,6808 ez heizet zv sente Merien stern
0,6809 In allen dutschen zvngen

0,6810 da die zwei svzen ivngen
0,6811 bestatet vn- begraben sin
0,6812 kvnic Marke sich selbe dar in
0,6813 begap vn- cvrvenale
0,6814 gap er da Cvrnewale
0,6815 daz kvnicrich vn- engenlant
0,6816 die beide Cvruenales hant
0,6817 dinten vntz an sinen tot
0,6818 Tristan vn- sin vrowe ysot
0,6819 Nicht v're von einand'
0,6820 In zwein sarken gland'
0,6821 lagen in d' erden
0,6822 vf Tristan den werden
0,6823 liez d' kvnic vzerkorn
0,6824 pelzen eine- rosendorn
0,6825 Marke d' sich da het begeben
0,6826 vn- eine- grune- winreben
0,6827 liez er vf ysoten
0,6828 pelzen . den zwein toten
0,6829 geliben edele vn- hochgeborn
0,6830 d' winrebe vn- d' rosendorn
0,6831 wurtzelten schone an d' stunt
0,6832 Iglichem in sins h'zen grunt
0,6833 da noch d' glunde mimetranc
0,6834 an den toten h'zen ranc
0,6835 vn- sin art erzeugete
0,6836 Iglich ris da neigete
0,6837 dem ande'n ob den grebern sich
0,6838 vn- in einand' minne-clich
0,6839 vlechten w'ren vn- weben
0,6840 den rosenpusch vn- den winreben
0,6841 gar bescheidenlich man sach
0,6842 als Thomas vo- britania sprach
0,6843 von den zwein svzen ivngen
0,6844 In lampartischer zvngen
0,6845 also han ich vch die warheit
0,6846 In dutsche von in zwein geseit
0,6847 Nv dar ir werlde minner
0,6848 sehet alle in disen spigel her
0,6849 vn- schowet wie in aller vrist
0,6850 hin slichende vn- genlich ist
0,6851 die werltliche minne
0,6852 ysot die kvneginne
0,6853 wie die in siner minne bran
0,6854 vn- in ir minne h' Tristan
0,6855 ez nam doch swaches ende
0,6856 ein iglich cristen wende
0,6857 h'ze mvt vn- sinne

0,6858 hin zv d' waren minne
0,6859 die vnzvrgenlich ymm' ist
0,6860 wir Cristen sulen minne- Crist
0,6861 d' von d' megde wart geborn
0,6862 vn- vns den blunden rose-dorn
0,6863 bezeichent wol in aller stunt
0,6864 d' an de- cruze durch vns wunt
0,6865 wart in den tot pinicliche gnuc
0,6866 vn- d' di rosen rote- truc
0,6867 Mit bitterlichem smerzen
0,6868 dvrch vns an sine- h'zen
0,6869 an vuzen vn- an henden
0,6870 wir Cristen sulen wenden
0,6871 an in lip sele vn- vnser leben
0,6872 wan wir ez sin die winrebn
0,6873 die vz im liez ensprizzen her
0,6874 vnd vns d' trovben vruchtber
0,6875 hat gemacht daz wir han
0,6876 sin vn- v'nunft nv rufe wir an
0,6877 den vat' des hymelichen svns
0,6878 daz er la vlechten sich in vns
0,6879 den waren blvnden rose-dorn
0,6880 Crist sinen zarten svn einborn
0,6881 vn- vns die genade gebe
0,6882 daz wir alsam die winreb-e
0,6883 vns vlechten wid' in in
0,6884 vn- vnser herze vn- v-se'n sin
0,6885 In im v'werren vn- v'weben
0,6886 als man sach den winreben
0,6887 sich vlechten in den rosendorn
0,6888 vb' den geliben vzerkorn
0,6889 Die in der libe ir ende namen
0,6890 Nv sprechet amen amen amen